

Konetolama
Yuma, Arizona, USA
65-1204

1 Ndako monene oyo ya makita awa na — na Yuma, ezali litomba monene mpo na ngai ya kozua bobyángi oyo mpo na kozonga lisusu. Tolekisasi ntango moko kitoko mbala ya suka awa. Mpe ntango nasosolaki ete nasengelaki kozonga lisusu, namiyokaki malamú mpenza, koyoka matatoli mpe maloba kitoko ya bato, yango ezali kolendisa mwa moke.

2 Billy ayebisaki ngai ete ndeko mobali ya Las Vegas oyo azali na mposa ya liyangani kuna na ndako ya makita, ... moná ye mbala moko na nsuka ya liyangani, azali awa. Alobi ete soki tozali na ntango tokoki koleka kuna na sanza ya yambo, tokende na Las Vegas liboso ya liyangani ya Phoenix. Mpe boye tozalaka ntango nyonso na mposa ya kokende kuna. Nabanzi ete Ndeko Art Wilson azalaki kofanda kuna eleki ntango molai, to ntango mosusu azalaka kaka kuna. Mpe a—asengaki na ngai ete nákende kuna, ye ná Ndeko mwasi Wilson. Kasi nazuaki libaku ya kosala yango te, boye mbala mosusu oyo ekozala ntango nakoki kokende.

Yo moná kaka Billy Paul to Ndeko Roy Borders. Nakanisi azali esika moko boye awa. Moto moko alobaki ete Ndeko Roy azalaki awa. Ndeko Pearry, Ndeko Lee, to moko kati na bango akoki koyebisa yo. Boléngela mikolo oyo tosengeli koya.

3 Sikawa, namoni batei mingi awa eleki mwa ntango moke, nazali na esengo mingi ya kokutana na bandeko na ngai. Soki nazalaki na ntango, nalingaki kokende na ndako elongo na bino, mpo nayebi ete bozali na balambi ya malamú koleka na ekólo. Ezali malamú.

Mpe sikawa, Ndeko Pearry azali mpenza na makambo mibale likolo na ye na mpokwa ya lelo. Makambo mibale mazali kotelemela ye sikawa. Moko na yango ezali ya kokata mikró wana kuna. [Ndeko Branham aseki. — N.D.E.] Yo nde—yo nde okweisami na likambo yango, Ndeko Pearry. Nandimi mpenza te ete yo nde okweisami. Kasi yo ... moto moko azalaki komilengela mpo na koloba. Ezalaki mpenza likambo ya kosekisa.

Na bongo, akendeki lisusu kuna mpe azalaki koloba. Alobaki: “Loba naino!” Azalaki koloba na Ndeko Collins to na moto moko kati na bango. Alobaki: “Bilei ya mpokwa ezalaki malamú. Kasi, “alobaki,” nazali koyebisa bino, “alobaki,” moto yango asengeli kozala moto ya mboka Espagne to eloko moko ya bongo, to mpe moto ya Mexique. Wana ezalaki pilipili ya makasi oyo naino nameka te.” [Losambo eseki. — N.D.E.] Akobaki koloba motindo wana kozánga koyeba ete azalaki koloba na molambi bilei ye moko.

Ye ayanolaki ete: “Ngai nde nazali molambi.”

Oyo ezali Texas mpo na bino. Tokozongisa ye na nzela awa na Arizona, nsima na ntango moke, soki atikali elongo na biso awa, boye te?

Nasepeli mpenza kozala awa! Mpe nabanzi ete eyokani lokola maseki te, kasi ezali bobele koyeba kosekisa. Nkolo Ye moko ayebaki kosekisa, boyebi. Alobaki: “‘Elode,’ kende koyebisa gambala wana, bomoni, ‘lelo nabengani—nabengani milimo mabe; lobi nakobonga be.’” Na boye, Ayebaki kosekisa. Ee, ekosala biso mabe te, nandimi te, na bantango mosusu.

4 Mpe sikawa, ntango eleki mwa moke. Mpe mbala mingi na—natáyaka pene na bangonga minei. [Losambo eseki. — N.D.E.] Na bongo, lokola nayebi bokóndé ya ndeko mobali ná ndeko mwasi awa na ndako ya makita oyo, tokokitisa ntango yango na nse na mpokwa oyo. Mpe bobele ... Nayebisaki Terry. Nalobaki ...

Atunaki ngai: “Nini ... Totia bande ya ngonga mibale?”

Nalobaki: “Te, Terry. Oyo ezali—elambo.” Nalobaki: “Nakoloba na bato bobele mpo na miníti ntuku misato to ntuku minei likolo na likambo moko.” Oyo nameká kutu mbala nyonso, lokola nayebi yango.

5 Ntango nazalaki mwana moke, bato bazalaki na momesano ya koya koyoka mpo ete nazalaki elenge motei, mwa elenge mobali moke mpenza, mwana. Mpe bazalaki koloba: “Ee, Billy Branham, boyebi, kaka elenge, akendá kelasi ata te mpe atangá te.” Mpe bazalaki koya koyoka maloba na ngai ebukana bukana, Lingelésa na ngai ya Kentucky, mpe—mpe na bongo ba ...” hits, mpe haints, ná ba totes mpe carry” [Lolenge na ngai ya koloba. — N.D.T.]

Lokola na moko ya mayangani awa, kala mingi te, balobaki: “Biso nyonso totélema mpe toyemba loyémbó ya lokúmu ya ekólo.”

Natelemaki mpe nalobaki: “Mpo na ndako na ngai ya kala Kentucky kuna mosika.” [Losambo eseki. — N.D.E.] Yango nde ezalaki ekólo bobele moko oyo nayebaki, na bongo ezalaki loyémbó ya lokúmu mpo na ngai.

6 Bongo, sikawa, nsima na ngai kokóma mokóló, ee, ee, malamú ... osengeli kozala na eloko moko

koleka oyo wana. Bomoni? Tozali kozua ... Polo alobaki: "Ntango nazalaki mwana, nazalaki koloba lokola mwana mpe kokanisa lokola mwana. Ozali kosala makambo lokola mwana." Kasi ezali yo kokoma mokolo, okobanda kosala matambe na yo ya liboso, kotatabana mpe kokweya, kotelema mpe komeka lisusu kosala yango. Mpe na nsima na ntango moke, okobanda kotambola na molongó semba. Mpe ezali yango nde tosengeli kosala lokola basodá ya ekulusu. Sikawa ezali ntango ya kotambola na molongó semba na nzela monene oyo ezali komema na Nkembo.

7 Nandimi mpenza ete tozali kobika makambo ya suka ya mambi ma mokili oyo. Nandimi mpenza ete Boyei na Nkolo ekómi pene mpenza koleka ndenge tozali kokanisa. Na bongo, sikawa mpo na bobele miniti ntuku misato to bongo ya ntango na bino, nakolinga kobenda bokebi na bino likolo ya Likomi oyo nalingi kosalela mpo na liteya, mpe—nakosalela mpe makomi misusu awa. Ngai ...

Wana nafandaki na ndako mokolo moko, nazalaki komanyola likolo ya likanisi oyo. Na bongo namilobelaki: "Ee, nayebi te soki nakoloba likolo na Likomi oyo nyonso. Nakozua bobele eteni na Yango, mpo na mwa mayangani ya mikuse lokola oyo tozali na yango na mpokwa oyo." Nalingi koloba likambo moko na ntango bozali koluka mokanda na ba-Nzembo. Ba—ya liboso ... Nzembo 27, nalingi kotanga milongo mitano ya ebandeli.

8 Nakolinga koloba boye, na ntina na milulu oyo ya bato na Mombongo ya Nsango Malamu Mobimba.

Ndeko na ngai Peary azalaki koloba na ntina na babuku mpe bongo na bongo, ná babuku ya sika oyo bazali na yango. Bato boni bazali komikanisela ntango tozuaki bande yango, mpe toteyaki awa na Phoenix, na moko na makita likolo na: *Mbuta Muntu, Tokomi Ngonga Nini?* Sikawa, wana ezalaki ebandeli ya buku yango, bomoni, ntango ba ... oyo esalemaki.

Matatoli ya kokamwa ya Liloba na Nzambe oyo ekomami mpo na ntango oyo ezali mingi, mpe etalisi ete likambo moko ezali kobelema na biso sikawa. Tozali bobele ... Ezali soló mpenza. Makambo oyo bino ... Bino bokokamwa soki boyebi makambo maye mazali mpenza kosalema. Mingi kati na bino, bapaya, mbala mosusu bozali koyoka mibali oyo kotelema mpe koloba—koloba na ntina na: "Nsango ya ntango oyo," mpe bongo na bongo. Oyo balingi kokóma na yango ezali elaka ya Nzambe mpo na ngonga oyo, likambo Ye Alakaki ete Akokokisa. Mpe tozali komona Ye, engebene na Makomi, makambo mpenza oyo Alobaki ete Akosala, bobele bongo. Makambo maye malakamaki liboso, mazali mpenza kokokisama malamu ntango nyonso, mpamba te ezali Nzambe nde alobi yango.

9 Soki moto, ata soki azali nani, ameki kosakola eloko ya boye ... ezali na konzo moko likolo na bamilioni zomi. Soki moto yango ayebisi yo ete likambo moko ekosalema, mpe yango—yango ekoki kosalema na ngonga moko boye ; konzo moko likolo na bamilioni zomi. Na sima, soki alobi mpenza *esika* yango ekosalema, ekozala pene na konzo moko likolo na bamilioni mokama.

Mpe na nsima soki asakoli na bosikisiki *ngonga* ekosalema, mpe bongo na bongo, mpe *lolenge* ekosalema, mpe likambo *nini* ekosalema, mpe bongo na bongo, wana eleki mpenza makanisi. Ntango tomoni yango kokokisama malamu mpenza, moko na moko mpe mbala nyonso, wana toyebi ete ezali Nzambe.

Mpe na sima, tokotàla mbala moko kati na Makomi. Ekoki komonana ndenge mpo na biso. Kasi tozongi kati na Makomi, kozanga koyeba esika nini kotala, mpe Molimo Mosantu azali komonisa yango polele mpe kolakisa yango kati na Liloba mobimba, kobimisa elilingi polele mpo na kotalisa biso ngonga oyo tozali kobika kati na yango. Bileko bizali kobongwana.

10 Tozali—tokómi na litúmu. Ezali pete ntango moto moko azali kosala litúmu, ntango motongi ndako azali kotonga litúmu. Na ebandeli, moto nyonso akoki kotia ba biliki na molongo moko, lokola ebongiseli moko ebandaka, babandaka kotonga na molongo semba, ezali na yango malamú. Kasi, ntango okomi na ba nsuka, bisika oyo osengeli kobaluka mpo na kotonga na ngambo mosusu!

Sikawa, Nzambe azali kotonga etutú te. Azali kotonga ndako, bomoni, mpe Alakaki bisika ya kokata mpe ya kobaluka mingi awa na kati ya Biblia. Mpe kotonga ba nsuka ya ndako, moto nyonso akoki komeka kosala yango, kasi esengeli kolanda mwango. Soki ezali bongo te, basengeli kobuka yango lisusu.

11 Na boye to—tokumisi Nzambe mpo na bolamu na Ye mpe mpo na bondeko na bino, mpe bikuke oyo Nkolo afungoleli biso na nzela ya bato na mombongo oyo. Nazalaki ntango nyonso kondima ete na—nazalaki kondima te kati na ... nandimaka bato oyo bazali kati na bibongiseli. Kasi nazali na ntango mingi te ya kolendisibibongiseli, mpamba te moko na moko azali kotonga etutú zonga-zonga na ye moko.

Mpe—mpe ezali mpenza lokola, nabanzi ezalaki kati na lisolo moke oyo Ndeko David alobaki na ntina ya mabata oyo azalaki kobokola; alobaki ete mai ya ebale emataki. Mpe libata moko moko azalaki na mposa ya kozala na bondeko na bamisusu, kasi bakokaki kosala yango te mpo ete bazingamaki na bitutú. Kasi ntango mai ematákí na mosanda ya likolo, ememami bobele mabata yango libanda ya lopango.

Boye na—nakanisi ete esengeli kosala bongo. Mai nde ezali komata, bomoni, mpe na bongo tokoki

kobima na lopango mpe—mpe kozala na bondeko bamoko na basusu, boyebi, kozala na bolingo ya solosolo ya Klisto kati na mitema na biso.

12 Mpe Bato na Mombongo Ya Nsango Malamu Mobimba oyo bazali lokola—lokola maziba ya mai kati na esobe mpo na ngai. Mpamba te, mbala mingi ... Nazali na bandeko mibali, bandeko mibali malamumu, nabanzi kati na ebongiseli moko na moko oyo nakutána na yango: ba-Presbiterien, ba-Lutherien, ba-Batiste, ba-Pantekotiste, LIngomba na Nzambe, ba-Nazaréen, ba-Pèlerins de la Sainteté. Bandeko malamumu, bipai nyonso. Kasi, mbala mingi, bakoki koyamba ngai na lisanga na bango te, mpo ete, bomoni, ezali te ete baboyi kondima yango, kasi, bomoni, bakobengana bango na bibongiseli na bango. Mpe soki osali bongo, na ntembe te, — yango nde ekosalema.

Awa, eumeli te, ndeko moko ya Metodiste ayaki epai na ngai, Nakotanga nkombo na ye te. Mobali moko malamumu, azalaki kokoma buku moko likolo na kobikisama na nzoto kouta na Nzambe, mpe ayaki epai na ngai mpo na—mpo na mwa lisoló. Tofandaki mpe tosoloraki mwa moke. Alobaki: "Likambo moko mpamba tozali na yango kotelemela yo ezali ete yo ozalaka ná ba-Pantekotiste wana ntango nyonso."

Nalobaki na ye: "Soki bongo, tika losambo ya ba-Metodiste basunga yango. Wana nakoya."

Wana nde esalaki bokeseni. Bomoni? A—alobaki: "Ee, na ntembe te, na—ngai nazali lingomba ya ba-Metodiste te. Nazali bobele moto na bango."

Nalobaki: "Ezali yango. Bomoni? Bazali baoyo, ba-Pantekotiste, bango nde bazalaki kofungola bikuke na bango. Bomoni? Epai na bango nde nakoki kokende. Mpe na baoyo nyonso bakofungola bikuke, ee, tomilengeli mpo na kokota."

Lokola na Emoniseli, mokapo ya 3, elobami: "*Natelemi na ekuke mpe nazali kobeta. Soki moto ayoki mongongo na Ngai mpe afungoli ekuke, Ngai Nakokota mpe Nakolia elongo na ye.*" Mpe wana ezalaki Yesu. Bisu nyonso toyebi ete ezalaki Klisto, mpe Azali Liloba. Ya solo. Azali Liloba.

13 Na bongo, Bato na Mombongo ya Nsango Malamu Mobimba bazali maziba ya mai na esoba esika tokoki koyangana elongo. Lingomba moko te ezali kosunga yango. Bango nyonso elongo, ba—bazali kouta na mangomba makeseni, mpe toanganaka elongo mpo na kozala na bondeko bipai binso na mokili.

Mpe ngai nasungá mpo na kosalisa mayangani na ba ndako minene mingi, mingi, mimgi mpenza kati na mokili mobimba, ya Bato na Mombongo ya Nsango Malamu Mobimba. Nazongisi matondi mpo na libaku yango oyo epesamelaki ngai. Kati na yango, bato na mombongo bazali kosunga yango. Bongo, mangomba nyonso, ba—balingi koya, ata bongo.

Kasi, na sima, soki ... Ngai nalingi ata moke te komeka kobenda moto moko libanda ya lingomba na ye. Tikala bobele na losambo na yo mpe panza Pole. Bomoni? Zalá Moklisto ya solosolo. Mokambi na yo akosepela na yo. Zalá mosantu ya solo, ya bosembo, ya malamumu mpenza; moto nyonso oyo andimi Nzambe akosepela na moto ya ndenge wana. Iyo.

Sikawa, natondi ndeko oyo, ná mwasi na ye, mpe milulu oyo mpo na libaku oyo. Mpe tika ete ndako ya milulu oyo ekola. Tika ete mapamboli ya Nzambe ézala likolo na yango, mpe yango ézala esalelo kati na maboko na Nzambe, mpo na kobikisa nkama na nkama ya bato liboso na Boyei na Nkolo; mpe bibongiseli mosusu nyonso to bantoma ya bibongiseli oyo bizali awa.

14 Na Buku na Nzembo sikawa, nalingi koteya likolo na—na likambo moko ya kokamwa mpenza na mpokwa oyo, bobele mpo na mwa ntango moke. Nazali na ndambo na makomi awa. Mpe—mpe nakanisaki ete ntango mosusu na mpokwa, nakanisaki koteya likolo na likambo mosusu. Kasi, komona ete ngonga eleki, ee, nalingi kokanga bino mpo na ntango molai te, boye natalaki bobele awa mpe nazui Makomi mosusu. Mpe nalingi kolobela likolo na: *Konetolama*. Bomoni?

Sikawa, tondimaka ete Konetolama moko ekozala. Baklisto nyonso bandimaka yango, batangi ya Biblia bandimaka ete Konetolama moko ekozala.

15 Mpe sikawa mpo na botangi ya mobóko, tokotanga na Nzembo 25. Nalingi koloba ... Bolimbisa ngai. Nzembo 27, molongo ya 1 kino na 5.

Yawe azali pole na ngai mpe lobiko na ngai; Ngai nakobanga nani? Yawe azali makasi ya bomoi na ngai; Nakozala na nsomo ya nani

Ntango bato mabe, ata bayini na ngai mpe banguna na ngai, bazali koya likolo na ngai mpo na kolia mosuni na ngai, ezali bango nde bazali kobeta libaku mpe kokweya.

Ata soki mapinga mazingeli ngai, motema na ngai ekobanga te: ata soki etumba ebimeli ngai, ata bongo nakotya motema.

Nasengi na Yawe eloko moko yango nde nazali koluka; ete nafanda na ndako na Yawe

mikolo nyonso ya bomoi na ngai, mpo na kotala kitoko ya YAWE, mpe kotala na botondi tempelo na Ye.

Mpo Akobatela ngai na ndako na Ye na mokolo na likama; mpe Akobomba ngai na nkuku ya hema na Ye; Akotelemisa ngai likolo na libanga.

Tika ete Nkolo abakisa mapamboli na Ye na botangi ya Liloba na Ye.

16 Sikawa, lelo, nakolobáká likolo na liteya oyo, mpe sikawa, basusu kati na bino bakoki komona kokesana na—na banzela oyo nazui. Kasi boni awa bandimi ete Biblia ezali koteya ete Konetolama ya Lingomba ekozala? [Losambo elobi: "Amen." — N.D.E.] Iyo, mbuta muntu. Ya solo mpenza, konetolama ya Lingomba. Ozala Metodiste, Batiste, Presbiterien, to soko nani, Pantekotiste, konetolama ekozala.

Mpe nakanisi ete, nakoloba, na—nazali te koluka koya awa mpo na koloba likambo oyo ngai nabanzi ete ekosepelisa bato. Nakweisama ata moke te na likambo ya bongo. Nalingi kotelema awa mpe koloba eloko oyo nakambami ete naloba yango, oyo nakanisi ete ekozala lisungi mpo na bino, likambo moko oyo ekokolisa makambo oyo bobiki elongo na Nzambe soki ozali Moklisto, kasi soki ozali moklisto te, okoyoka mpenza nsoni na yo moko na lolenge ete okokóma Moklisto. Mpe yango nde ntina namekaka ntango nyonso kotya makanisi na ngai na lolenge Nkolo akokamba ngai.

17 Sikawa, biso tokebisami ete na mikolo ya suka, bato bakotyola Malakisi oyo. Soki bolingi, totanga Yango mwa moke. Ezali na Petelo ya Mibale, mokapo ya 3. Tótanga naino mwa moke likolo na yango. Mokapo ya 3, mpe molongó ya 3 ná 4. Totala soki yango ezali solo te.

Bóyeba liboliboso likambo oyo, ete na mikolo ya suka batyoli bakoya ná koseka na bango, kotamboláká engebene ba mposa na bango moko,

Mpe kolobáká ete: Wapi Elaka ya boyei na Ye oyo elakamaki? ... uta ntango bankoko na biso balálá na liwa, makambo nyonso ezali kokoba kaka ndenge ezalaki banda kozalisama ya mokili.

Zambi bazali kobosana na nko likambo oyo ete likolo ezalaká kala na nzela na Liloba na Nzambe, mpe mabelé oyo ebimaki libanda na mai mpe epikami likolo na mai:

Mpe na nzela na yango mokili ya ntango wana ebebisamaki ntango ezindaki na mai.

18 Sikawa tomoni ete, ntina oyo motó ya liteya oyo ezali kozwama na kilo te, ezali mpo ete mosakoli awa alobaki ete na mikolo oyo ya suka, batyoli bakoya mpe bakoloba makambo oyo. Bomoni? Yango esakolamaki liboso, ntina oyo bato bazali kosala lelo ndenge bazali kosala. Ee, boyebi mpenza ete ekozala bongo, mpo Biblia elobi yango. "Na mikolo na nsuka bato bakozala bato oyo basilikaka noki, bavimbi na lolendo, balingi bisengo ya mokili koleka Nzambe, bazangi bosembo, bakosi, batomboki, bayini ya bato malamumu; bazali na lolenge ya kosambela nzokande bazali kowangana nguya ya ezalali yango: kende mosika na bato wana." Tokoki komona bomekoli ya Bosóló? Na ntembe te.

19 Ntango Mose akendeki na Ezipito, mpo na kokangola bana na Yisalaele, ná nzete na loboko lokola litatoli, mpe elongo na Nzambe na Lola na nsima na ye, asalaki likamwisi. Bamekoli bayaki nsima na ye, mpe basalaki likambo moko oyo ye asalaki. Bomoni? Sikawa, bango bazalaki na esika ya mibale, nsima na ye kosala yango yambo. Na bongo bayaki zongazonga mpamba te bazalaki kolanda oyo ye asáláki, komekoláká oyo ya ebandeli. Tomoni yango.

Mpe sikawa yo okoloba: "Ee, wana ezalaki na mikolo ya Mose."

Kasi kaka Makomi yango elobi ete bakoya lisusu na mikolo ya suka. "Lokola Yambele ná Yane batelemelaki Mose, bongo mpe bato oyo, ná makanisi na bango ya kopengwa, bazali kotelemela Solo." Bomoni? Komekola, makambo ya ndenge nyonso mpo na kobulanganisa bato. Na nsima soki ...

Konetolama oyo ezali koya ... ezalaka ntango nyonso na eloko moko oyo emekaka kotelemela oyo Nzambe azali na yango na molongo ya Liloba na Ye, soki ekoki. Ezali—ezali—ezali mokano ya Satana kosala bongo.

Lokola likambo ndeko oyo autaki na liyangani ya Las Vegas alobaki: "Satana alobaki ete mokili ezalaki na nse ya bokonzi na ye, mpe—mpe lisusu azali na bamboka mokonzi na ye kuna."

Nayebi ete Satana azali nzambe ya mokili oyo. Ekólo nyonso na nse ya mapata ekonkami na ye. Ya solo mpenza. Mokili oyo ezali ya Satana, kasi Yesu akokamata yango. Satana abonzelaki Ye yango mokolo moko. Mpe Ye aboyaki yango, kasi Alobaki ete ... mpamba te Ayebaki ete Akosangola yango na mikolo mizali koya.

20 "Batyoli." Tika toumela mwa moke likolo na liloba moko oyo liboso na biso kokende mosika. Batyoli!

Eleki póso mibale na Tucson, nazalaki kotanga zulunále moko, epai wapi bakomaki maloba ya

mongelesa moko ya Angleterre. Na motó ya likambo ya zulunale bakomáki ete kobakama na ekulusu ya Nkolo na biso Yesu Klisto ezalaki bobele lokuta oyo ebongisamaki kati na Pilato ná Yesu, ete Ye ayaki bobele mpo na kosala ... komikomisa eloko moko. Mpe nzela ezali te mpo na biso kotalisa na bango ete ezali bongo te, mpo ete makambo na Nzambe nyonso eyambamaka na nzela ya kondima. Tosengeli kondima yango. Nzoka nde mongelesa yango akobaki kotalisa lolenge kani yango esalemaki.

21 Kala mingi te awa, na ekólo monene wana, na Londres na Angleterre, kutu, epai John ná Charles Wesley, ná ebele ya batei minene ya ebandeli, Spurgeon mpe basusu, bateyaki Nsango Malamu kati na bibombelo ya matiti makauki mpe bisika nyonso kuna. Bato babwakaki nsango ya eleko na bango, mpe botala oyo bango bakomi lelo.

Kuna nde esika Ndeko Williams ná bamosusu bazali na mpokwa oyo. Ezali moko na bikolo oyo ezali na nse mpe na mbindo koleka kati na mokili. Natambolá na mokili mobimba, kasi nayebi eloko mosusu te oyo ezali na bosoto lokola Anglere. Ezali ... Billy Graham alobaki likambo moko wana. Ee, esengelaki na ye kobimisa mwasi na ye na balopango bisika ya kotambola mpe kolekisa ntango na ntina na—na—na makambo ya bosoto kati na mibali mpe basi oyo ezalaki kosalema liboso ya bato nyonso na bisika yango. Ntango nazalaki kuna, namoná naino eloko oyo ekoki kobuka motema ya moto te lokola makambo oyo ezalaki kosalama na Angleterre; ekolo oyo ezuaki libakú, mpe oyo na ntango moko ebandisaki mbongwana na mokili. Eltalisi bobele boni ekoki kokwea.

Kasi, bomoni, eloko oyo esali bongo ezali ete nsango moko esakolamaki na eleko wana, bato ya Angleterre bazali komeka kokangama na nsango moko wana lelo. Yango ekotambola te lelo. Ekosimba te. Ndenge nini ...

22 Bongo soki Mose áyáka, mpe ámémaka Nsango ya Nowa: "Tokotonga masuwa mpo na kotepa na ebale ya Nile"? Elingaki kosimba te. Nsango ya Yesu mpe elingaki kosimba mpo na Mose te. Nsango ya Wesley mpe ekotambola ata moke te na ntango ya Luther; to nsango ya Luther mpo na Wesley, moko to mosusu.

Mpe lelo, biso, mbongwana monene ya suka mpo na biso ezalaki Pantekote. Mpe lelo, tozali kolongwa na yango. Mpe nsango ya ba-Pantekotiste ekosangana na oyo te, mpo ete tozali na eleko mosusu. Nyonso ezali Liloba na Nzambe, kasi ndako ezali kotongama. Ebandi na makolo, maboko, ezali komata mpo na kosala Mwasi na libala mpo na Konetolama. Bomoni? Yango—yango elongoli bato ya ntango wana te; bango babikaki Nsango na bango. Baye banso bazalaki kati na Mwasi na Libala bakobima.

Kaka lokola bomoi emataka na nzete ya lisangu. Elongwe na lisangu, mposo, kasi mbuma ya lisangu ezali kosalema, lokola mbuma ya lisangu oyo ekweyaki na mabelé.

23 Eleki ntango molai te awa, nazalaki kotanga buku moto moko ya mboka Allemagne akomaki mpo na kobeta ntembe. Alobaki: "Na—na balandilandi nyonso ya mokili, William Branham aleki bango nyonso." Alobaki: "Ee, azali bobele ... Azali—azali moto ya maji. Asalaka makambo wana." Bomoni, moto yango ayebi.

Mpe na boye, moto yango azalaki motyoli. Azalaki ata kondima Nzambe te. Alobaki: "Nzambe oyo akokaki kofanda kimia na bileko ya molili, Akangi maboko likolo ya libumu na Ye mpe azali koseka etonga ya bamama Baklisto; ná baoyo babengamaki bayekoli na Ye Moko, bamama ná bana na bango ya mikie mpe bongo na bongo, mpe Atikaki ete baliama na bankosi; mpe Asalaki ata eloko moko te." Bomoni esika makanisi ya mosuni, esika kotánga kelasi mpe nyonso wana, ekoki kososola emononeli te? [Losambo elobi: "Amen." — N.D.E.]

24 Mbuma yango ya lisangu esengelaki kokweya na mabele. Kaka ndenge Yesu asengelaki kokweya mpo na kosekwa lisusu, ndenge moko lingomba ya pantekote esengelaki kokweya. Esengelaki kokota na mabele, na bileko wana ya molili. Mbuma nyonso ya lisangu oyo ... Mbuma nyonso oyo ezali kokota na mabele, esengeli koleka na ntango wana ya molili, mpo ebotana.

Kasi ebandaki kobima na Martin Luther. Ekobaki na ntango na Wesley. Kino na Pantekote. Sikawa, ekomi na kati na mbuma. Mpe sikawa, mimesano ya bibongiseli oyo batikaki na nsima, mizali bobele nzete, esili. Mmesano wana ya bibongiseli esengeli kotumbama na móto. Kasi mbuma ya solosolo ya lisangu oyo ebimaki uta na moko na moko ya ba mbongwana wana, ekonetolama kati na Mwasi na libala. Yango nyonso nde ekosála Mwasi na libala.

25 Sikawa tomoni ete, na Angleterre kuna, bamekolaki kobakama na ekulusu eleki ntango molai te, ezalaki etonga ya bato wana, baoyo ya molai ... bilenge mibali wana ya nsuki milai mpe biloko mosusu, oyo bazalaki konganga mpe kobenga Yesu "Tata moke" mpe makambo nyonso wana. Bazali mpenza bato na yauli!

Sikawa bino bokoloba: "Wana ezali na Londres, na Angleterre."

Botala likambo oyo ekomamaki na zulunalo na mposo loleki, awa na Amerika. Monganga moko monene

ya makambo na bonzambe, oyo auti na eteyelo moko malam, alobaki ete ko—kobakama na ekululu ezalaki lokuta. Alobaki: "Yesu amekaki bobele komitalisa ndenge wana; ete amelaki matiti mabe."

Mpe tomoni ete elobami na ntina na yango na kati ya buku ya Ebandeli. Ezali matiti mabe lokola diámhá to eloko moko ya ndenge wana. Ezalaka mingi kuna na mikili ya ebimelo na ntango. Mpe soki omeli yango, ekolalisa yo mpongi. Ntango mosusu ... Mpe okozala lokola moto oyo akufi mpe bongo mpo na mikolo mibale to misato milandani.

26 Alobaki: "Ntango bapesaki Ye mai ya ngái ná nsongi, ekoki kozala ete ezalaki nde matiti mabe wana. Mpe ntango bapesaki Ye yango, akotaki na mpongi makasi lokola soko akufaki. Batiaki Ye na nkunda, mpe balalisaki Ye kuna. Nsima na mikolo mibale to misato, na ntembe te, ntango bakotaki kuna, Alamukaki lisusu mpe Azalaki na ye malam mpenza." Alobaki: "Akendeki na mboka Inde mpe Akufaki esika moko kuna lokola bato nyonso bakufaka, komekáká kokósa lolenge moko ya kosambela."

Yambo, motóngi wana, likambo nini esalaka bato? Bomoni, ezali bobele eleko oyo tozali kobika kati na yango, batiyoli, bomoni, mokolo ya kokokisama ya lisakoli.

27 Nzambe apésá ndambo ya Liloba na Ye na eleko moko moko, mpe moko na moko ya bileko yango esengeli komonisa yango. Abongisa mpe liboso bato na eleko moko na moko mpo na kokokisa Liloba yango. Mbala nyonso Apesaka Liloba na Ye, Abongisaka moto moko mpo na Yango. Ntango Akanaki ntango ya Mose, Abongisaki Mose mpo na Yango. Ntango Akanaki eléko oyo Mwana na Nzambe Asengelaki kobotama, Abongisaki Ye mpo na ntango yango. Na bileko nyonso, Atindaka moto na Ye, Abongisaka ye liboso ndenge Biblia elobi. Eloko moko te ...

Soki Nzambe azali na suka te, Mozui-na-Nguya Nyonso, na nguya nyonso, bisika nyonso, na boyebi nyonso, mpo Ayebi makambo nyonso uta na ebandeli. Na bongo, Ayebaki. Eloko moko te elongwe na esika na yango. Ezali bobele biso nde tozali kokanisa bongo. Makambo mazali kotambola malam. Zongá kati na Liloba na Ye mpe tálá oyo Azali kosala, na ntango wana nde okosósola.

28 Sikawa, bokanisa naino. Mpo na kobanda, soki motei yango ákanisaka, alingaki komona ete ntango batiaki mai ya ngái mpe nsongi na monoko na Ye, Abwakaki yango. Amelaki yango te mpo na kobanda. Bomoni? Ezali bobele batiyoli oyo bazali kotelema! Likambo mosusu, ndenge nini Yesu oyo ya Nazalet, ndenge nini bomoi na Ye ekokánáki na lisakoli moko na moko ya Kondimana na Kala? Boni boni ekoki kozala bongo? Ekokaki kozala bongo te soki Nzambe abongisaka yango te. Bomoi na Ye ekokani na esakweli nyonso ya Kondimana na Kala. Likambo mosusu, soki bayekoli bákósaka na ntina na Ye lolenge wana, mpo na nini moko na moko na bango akufaki lokola martíru? Mpe ata ntoma Petelo alobaki: "Botia ngái motó na nse makolo likoló. Nabongi te kokufa lokola Ye." Lolenge bakamataki Andele mpe babákáki ye na ekululu na mopanzi. Bango nyonso, batiaki elembo na litatoli na bango na makila na bango moko. Bandimaki Ye mpe balingaki Ye, mpe bapesaki bomoi na bango mpo na Ye. Soki Yesu ázalaka mobúbi, ndenge nini bakokaki kosala bongo? Bomoni? Bato basosolaka ndimbola ya molimo te.

29 Kala mingi te, Moto moko ya monene azalaki awa, rabi moko monene oyo akomami ete: "Mose, ntango akatisaki Mbu Motane," alobaki ete: "ezalaki mpenza mai te. Mpe lisusu mai esalaki bitutu te." Alobaki: "oyo esalamaki ezalaki ete kuna na suka ya Ebale ekúfá, ezalaki na esika moko etondi na nkekele. Mpe ye akatisaki nde mai ya nkekele, mbu ya nkekele. Mai ezalaki kuna te. Bobele maboké ya nkékélé, mbu ya—ya nkekele, balekaki kati na yango." Mpe bakambi ya mangomba mingi bandimaka yango, bango, mpe bayambi yango.

Eumeli te awa, ntango astronote ya yambo akendeki kuna likolo, ntango azongaki, amonaki eloko moko te ya Nzambe. Yango ebúlunganisaki ata bateyi. Bango bazalaki kokanisa ete Nzambe azalaki kofanda kuna na likolo na esika moko boye, na ntaka mokama na ntuku mitano. [[bakilometele 225]]

30 Ee, ólalá, koyekola mpe bwanya ya mokili oyo ebaloli lingomba na maboke ya matiti mabe! Ba ... Kotángá kelasi mpe lolenge ya kotángisa, zébi mpe bompénezá, euti na satana. Ezali bompénezá ya satana. Biblia elobi bongo.

Mpee bompénezá na biso oyo ezali koya ekozala ata na eloko moko ya kosala ná bompénezá oyo te, ata moke te. Eloko ata moko te ya oyo. Ekozala Bompénezá ya lolenge mosusu, ekeseni na oyo mpe na mokili ya bato na zebi oyo tozali na yango. Koleka tozali na bato na mayele, bato ya zebi, koleka tozali kokota kati na makambo ya liwa, mitambo mpo na koboma mpe biloko nyonso wana. Kati na Bompénezá oyo ya sika, kufa ekozala te, bokono te, mawa te, to mpasi te. Bomoni? Kuna ata moko te ekozala. Na bongo bompénezá oyo ekosengela kobomama, mpo ete euti na zabolo.

31 Tomoni ete na Buku ya Ebandeli mokapo ya 4, ete bato ya Kaina nde babandaki bompénezá, kotonga bingumba, ba-mboka mpe bongo na bongo, bibetelo ya miziki, mpe bakómáki bato na zebi. Mpe bato bakendeki mosika koleka na Nzambe, ata bongo bazalaki basambeli. Kasi ntango bato ya Sete bayaki, babandaki kobelela Nkombo ya Nkolo.

Ah, toloba na ntina na oyo ya mayele mabe!

Nazali awa te mpo na kozokisa mayoki ya moto moko to mpo na koloba likambo moko na ntina ya lingomba moko boye. Mpe soki ozali awa, mpe ozali moto ya losambo oyo, nazali koloba likambo oyo mpo na kozokisa mayoki na yo te; mpo kaka lokola bato malamungingi bazali kati na losambo oyo motindo moko mpe bazali kati na ba-losambo mosusu. Na Shreveport na póso loleki, nazalaki kotanga maloba moko ya lingomba Katoliko.

Mpe tozali komona lolenge bango nyonso bazali kosangana sikawa na likita monene ya ekimenizme, mpe bongo na bongo, mpe bazaki kokokisa na bongo oyo Biblia elobaki ete bakosala. Ya solo mpenza.

32 Sikawa tomoni ete balobaki: "Ee, Biblia ..." Baprotestá mosusu balingi kokangama na Biblia oyo. "Ee," bazali koloba, "Biblia ezali bobele buku, lisolo ya mambi ma kala ya lingomba, mpe bazalaki na yango na mikanda te kino eleki mibu nkama mibale na mitano. Ezalaka ntango nyonso lingomba." Alobaki: "Ezalaki lingomba, Biblia te, mpe Biblia ezali bobele lisolo ya oyo lingomba esalaki." Oyo nde lokuta mpe mayele mabe! Ee, tozali na Biblia esali mibu nkoto misato. Kondimana na Kala ekomamaki kati na Makomi mibu nkama na nkama liboso na boyei na Klisto. Ezali bobele mayele mabe ya zabolo!

33 Mpe tomoni ete na mikolo ya botiyoli mpe boseki Biblia, mpe koluka kobimisa Yango libanda, Nzambe asengeli kosambisa lingomba na nzela na eloko moko. Akoki te kozala bobele ...

Bakoki te koya na balala oyo mpe kokanga ngai nakolobáká ete nazali kotambwisa na lombango ya ntáká 30 na ngonga moko [[ba kilometele 45 na ngonga moko-N.D.T.]] na esika ya ntáká ntuku mibale [[bakilometele 30- N.D.T.]] soki eloko moko te ezali wana mpo na koyebisa ngai ete nazali na makoki ya kotambwisa bobele na lombango ya ntáká ntuku mibale [[bakilometele 30-N.D.T.]]. Esengeli kozala wana.

Mpe Nzambe akosambisa lingomba, Akosalema bato mokolo moko. Toyebi yango. Kosambisama moko ezali koya. Bongo soki Akosambisa yango na lingomba Katoliko, ekozala lingomba Katoliko nini? Soki Akokamata yango na ba-Methodiste, wana ba-Batiste babungi. Soki Asambisi yango na nzela ya lingomba ya bomoto moko kati na Bonzambe, wana ya bato mibale kati na Bonzambe babungi. Bomoni? Akosambisa yango na nzela ya nini? Alobaki ete Akosambisa yango na nzela na Klisto, mpe Klisto azali Liloba. Boye, ezali na nzela ya Liloba na Nzambe nde Nzambe akosambisa bato. "Na ebandeli Liloba azalaki, mpe Liloba azalaki elongo na Nzambe, mpe Liloba azalaki Nzambe. Mpe Liloba akómaki nzoto mpe afandaki kati na biso. Azali ndenge moko lobi, lelo, mpe libela." Bomoni? Na bongo, Akosambisa yango na nzela ya Liloba na Ye.

Mpe sikawa tomoni ete na mikolo oyo, ntango bazali komeka kobwaka Biblia libanda, mpe "Koyamba lingomba. Biblia; balingi Yango te. Lingomba, "mpo bakoka kosala bindimeli ya ndenge na ndenge to eloko mosusu, mpe batambola na yango.

34 Ee, ndenge nazalaki koloba na mpokwa mosusu na Shreveport. Na—na elambo, ntango babomaka mwana na mpate wana ya mbeka, "mfulu esengelaki kozala kati na bango te mpo na mikolo nyonso nsambo," mfulu ata moke te, lipa oyo ezali na mfulu te. Eloko ata moko te esengelaki kozala na mfulu. Yango ezalaki kotalisa bileko nsambo ya Lingomba oyo tozali kozua na buku oyo awa, mpe mfulu ezali te. Nini? Ezali eloko moko oyo esangisami na Yango. Mpe biso tosangisi bindimeli, bibongiseli mpe biloko mosusu nyonso ná Liloba, mpe tozali bobele komeka kobenga yango Liloba. "Mfulu esengeli kozala te mpo na mikolo nyonso nsambo."

35 Mpe ata eloko bozali kolia lelo, komeka kobomba yango mpo na lobi te. "Botumba yango ná móto, liboso ntongo étána," mpo Nsango ya sika ezali koya, mpe eloko moko ya sika. Bomoni, bazali komeka kobátela yango, kasi wana nde ezalaki ezalela ya lingomba. kolamuka esalemi, mpe eloko oyo ekolanda, boyebi, pene na mibu misato na nsima, bakobanda ebongiseli likolo ná yango. Lingomba moko oyo ebongisami ekobanda ebongiseli.

Kasi bino bokébi na likambo oyo? Esali mibu ntuku mibale sikawa uta oyo ezali kopalangana na mokili mobimba kozanga ete ekoma ebongiseli. Mpe ekokoma yango ata moke te. Oyo nde suka. Lisangu ezongi lisusu na masangu. Lisangu ezongi na mbuma na Yango. Mposo elongolami na Yango. Mpe lisangu esengeli kotiana Liboso na Bozali ya Mwana, mpo na kotela.

36 Ezali likambo ya kokamwa te ete, eleki mwa mikolo awa na ngambo ya ebimelo na ntango, molili tuu wana esalemaki? Bakokaki kososola yango te. Likambo moko wana esalemaki na Texas na póso eleki. Bakoki kososola yango te. Bozali komona te ete ezali elembo? Boyebi te ete bikólo bizali kopanzana? Yisalaele azali kati na mboka na ye. Mpe bilembo yango bizali kotalisa ete tokomi na suka. Na ntango moko oyo molili yango ezali kosalema, boyebi te ete ezali elembo oyo mosakoli alobaki? Iyo. "Kasi na ntango na mpokwa, Pole ekozala," ete Pole moko ekoya na ntango na mpokwa ntango molili mpe makambo makoselema ndenge ezali kosalema lelo.

37 Botala mpenza ndenge eyindaki. Pápa auti koya awa kala te.

Bokanisa lisusu, na losambo, ntango bango ... Bozali na ba-bande. Nakanisi, bino nyonso bozuaka yango. Ndenge Nkolo alakisaki kuna mokolo wana, kati na losambo, esika mpenza bileko yango ya

lingomba bikoza! mpe ndenge bikoza! Nayemaki yango na etánda kuna, bileko yango ya Lingomba oyo bozali komona eyemami awa na kati na buku. Mpe soki Molimo Mosantu ákitaka kati na Likonzi na Móto monene te, mpe Ákendaka mbala moko na nsima kuna na etutu mpe Áyemaka yango Ye moko te, ntango bato nkama misato to minei, bazali kotala Yango!

Mpe kaka ntango pápa abandaki mobembo na ye awa, sanza na lolenge moko to mosusu eyindaki. Mpe bakangaki yango bililingi, mpe bililingi yango bikokanaki mpenza na liyemi oyo esalamaki kuna na eteyelo. Sikawa asalaki mobembo awa na mokolo mwa zomi na misato, amataki bibuteli zomi na misato, apesaki kominyo na ba-zomi na misato, na ekólo oyo ezali motango zomi na misato, mpe molili tuu ekotaki bipai nyonso. Bokoki komona esika tokómí te? Tokómí na ntango ya suka.

"Batiyoli bakotelema na mikolo ya suka, mpe bakoloba: 'Bokeseni ezali te kati na ntango oyo mpe ntango batata na biso balalaki.'"

Kasi ntango bomoni makambo oyo ebandi kosalema, botómbola motó, bomilengela. Likambo moko ekoki kosalema ata na ntango nini, Klisto azali koya mpo na Lingomba na Ye.

38 Sikawa, bandimaka yango te, mpo ezali ... ezali ... Bango, basengela ... Bazali koyeba te ete bango nde bazali kokokisa Makomi. Bato bazali mpenza kososola te ete nakolobáká makambo wana, nakosaláká makambo wana, bazali nde kokokisa Makomi.

Boni moke Kaifa, nganganzambe mokonzi, ná banganganzambe nyonso ya ntango wana, baoyo bazalaki kotiyola mpe koseka Ye, boni bayebaki te ete Nzambe mpenza oyo bazalaki koyemba na ntina na Ye, "Nzambe na Ngai, mpo na nini Otiki Ngai?" Na Nzembo 22, "Batoboli maboko na Ngai ná makolo na Ngai." Koyembáká yango kati na tempelo, mpe Ye azalaki kokufa kuna na ekulusu. Bayebaki mpenza te ete bazalaki kosala yango. Ata Yesu abondelaki nakoloba: "Tata, limbisa bango. Bayebi te nini bazali kosala." Mpamba te, esakolamaki mpenza kati na Makomi ete bakozala bakufi miso.

39 Bino boyebaki ete esakolamaki kati na Makomi ete lingomba ya Misioni mpe lingomba Katoliko bakozala bakufi miso na mikolo ya suka; mpe Klisto akotelema na libanda, komekáká kokota na kati? "*Mpo ete ozali koloba: 'Ngai nazali mozui, mpe nazali na bosenga na eloko moko te,' oyebi te ete ozali moto na mawa, mobola, moto na bolozi, bolumbu, mpe mokufi miso kasi oyebi yango te,*" Emoniseli 3. Bomoni, bazongi na bokufi miso lisusu, konyatáká makambo ya Nzambe, lokola soki (bango) ezalaki na ntina ata moko te mpo na bango, kotiyoláká mpe kosekáká Yango. Yango nde Biblia elobi.

40 Kasi, mpo na Lingomba, Mwasi na libala, Konetolama ezali emoniseli mpo na Ye. Emonisameli Ye. Yango, emoniseli, Mwasi na Libala ya solo ya Klisto akozela emoniseli yango ya Konetolama.

Sikawa, ezali emoniseli, mpo ete emoniseli ezali kondima. Okoki kozala na emoniseli te kozanga ete yango ézala kondima. Kondima ezali emoniseli, mpo ezali eloko moko oyo emonisameli yo. Kondima ezali emoniseli. Kondima ezali eloko moko oyo emonisameli yo, lokola ezalaki mpo na Abalayama, ye oyo akokaki kobenga eloko nyonso oyo ekesanaki na yango, lokola soki ezalaki te. Sikawa kondima, yango nde oyo kondima ezali, ezali emoniseli ya Nzambe. Lingomba etongami likolo na emoniseli, Nzoto mobimba.

41 Eleki mwa bapóso, nazalaki kosolola ná motei moko malamumu ya lingomba ya ba-Batiste. Ayaki kosolola ná ngai. Alobaki: "Nalingaka yo lokola moto, kasi," alobaki, "yo obulunganisami mobimba."

Ngai nalobaki: "Na bongo, nabondeli yo sunga ngai ete na zonga na nzela," (alobaki ...) "ná Makomi."

Alobaki: "Tokoki ata moke te, Ndeko Branham, kotia makambo nyonso esika moko kino tokokokanisa Liloba moko na moko, Liloba nyonso, mpenza na lokóta ya Baela mpe bongo na bongo."

Nalobaki: "Oo, mbuta-muntu, oyebi malamumu koleka oyo." Nalobaki: "Ata kati na Likita ya Nicée, soki tozongi mosika kino kuna, mbula nkama misato sima na liwa ya Klisto, bazalaki kaka kokoba kowelana likolo na moto na mayele ya Moela nini azalaki na solo. Okoki koyeba. Likambo mobimba ezali emoniseli. Ezali em ..."

Ye alobaki: "Nakoki kondima emoniseli te."

Nalobaki: "Bongo ndenge nini okoki koyamba Klisto?"

Alobaki: "Ee, Biblia elobi: 'Ye oyo andimeli ... Yesu Klisto, azali na Bomoi ya seko.'"

Nalobaki: "Ezali solo. Elobami mpe lokola ete moto moko te akoki kobenga Yesu ete Azali Klisto, bobele na nzela na emoniseli ya Molimo Mosantu, oyo Amonisi yango epai na ye." Bomoni? Bokomi na esika yango, tozongi lisusu kaka na emoniseli mpenza. Yango esengeli komonisama, na kati na Biblia.

42 Kaina ná Abele bazalaki na Biblia ya kotanga te, kasi emonisamaki na Abele, na nzela na kondima, oyo ezali emoniseli. Abele apesaki na Nzambe mbeka malamumu koleka oyo ya Kaina. Yango wana Nzambe atalolaki ete azalaki moyengebeni.

Ntango batunaki Yesu awa na Matai 16: 17 mpe 18. Tozali na ntango te ya kotanga yango, kasi soki bolingi kokoma yango. Alobaki: "Bato balobaka ete Ngai Mwana na moto Nazali nani?"

"Moko na bango ayanolaki: 'Ozali Mose, Eliya, to mosusu.'"

Alobaki: "Kasi bino bolobi ete Ngai nazali nani?"

Alobaki: "Yo ozali Klisto, Mwana na Nzambe na bomoi."

Ye alobaki: "Esengo na yo, Simona mwana na Yona, mpoete mosuni mpe makila emonisi yango na yo te. Tata na ngai na Likolo nde amonisi Yango na yo. Likolo na libanga oyo, "emoniseli ya molimo ya Nani Nzambe azali, Oyo Yesu azali. Mpe Ye azali emoniseli ya Nzambe, Nzambe kati na nzoto mpe Amonisami na mokili.

"Azalaki kati na mokili. Nzambe azalaki kati na Klisto, kozongisáká bato na mokili na bondeko epai na Ye, komonisáká oyo Nzambe azalaki, kati na nzoto ya mosuni."

"Yo ozali Klisto, Mopakolami, Mwana na Nzambe."

Alobaki: "Mosuni mpe makila imonisi yango na yo te, kasi Tata na Ngai na Likolo nde Amonisi yo yango. Likolo na libanga oyo Nakotonga Lingomba na Ngai, emoniseli ya Liloba kati na eleko na Yango. Nakotonga Lingomba na Ngai, mpe bikuke ya ewelo ekoki kolonga Yango te."

43 Buku ya Emoniseli ezali Buku ya suka ya Biblia. Yango ekangami mpo na bazangi kondima. Na kati na yango, na mokapo ya ntuku mibale na mibale Biblia elobi: "Moto nyonso akolongola Liloba moko na Yango, to akobakisa liloba moko likolo na Yango, Nakolongola eteni na ye na Buku na Bomoi." Tososoli bongo ete, yango epesamaki na mobimba mpo na bandimi. Mpe Yango efungoli Buku ya Emoniseli mpe emonisi Nani azali Mobandisi ya Buku oyo mobimba. "Asengeli kotalama lokola Alfa ná Oméga," kobanda Genese kino Emoniseli, Yesu Klisto azali bobele lolenge moko uta ebandeli kino suka. Mpe ezali komonisa libombami na Ye mobimba mpe miango na Ye na oyo etali bileko ya lingomba oyo ezali koya, mpe yango ekangamaki kuna na Bilembo Nsambo.

44 Sikawa, Buku ekomámáki, kasi na sima, bóbosana te, ekangamaki na Bilembo Nsambo. Mpe Bilembo Nsambo oyo esengelaki te kofungwama (Emoniseli 10) kino na mongongo ya mwange ya suka ya mokili, na mokili, Emoniseli 10:7. Bomoni? "Mpe na mikolo ya mongongo ya mwanje na suka, mwanje ya nsambo, libombami na Nzambe ekokokisama na eleko wana." Mpe yango nde eleko oyo tozali kobika kati na yango.

Biso nyonso toyebi ete tozali kobika na Eleko na Laodikia. Eleko mosusu ekoya sima na yango te. Ekoki kozala bongo te. Na bongo, tozali kobika na Eleko na Laodikia. Mpe Bilembo Nsambo oyo ekangaki Búku yango, ezali libombami mpo na bato, esengeli kofungwama na mokolo yango. Yango nde likambo Ye Alakaki. Nzoka nde, ekozala eloko moko libanda na Liloba te, mpamba te okoki kobakisa to kolongola na Liloba te. Esengeli ntango nyonso kotikala Liloba. Kasi emoniseli ezali mpo na komonisa Solo na Yango, nini Yango ezali, mpo ézala na boyokani na biteni mosusu ya Makomi. Mpe na sima Nzambe atatoli ete ezali Solo. Bomoni?

45 Nzambe azali na bosenga ya molimboli te. Azali molimboli na Ye Moko. Ye Moko Apesaka ndimbola na Ye moko nakokokisáká makambo oyo Alobaki ete ekosalema. Lokola na ebandeli, Alobaki: "Tika ete pole ezala," mpe pole ezalaki. Ezali na bosenga ya ndimbola moko te. Etatolamaki.

Sikawa, Alakaki makambo mosusu mpo na ntango oyo ya suka, kati na Makomi. Ee, ezalaki mpenza wana.

Ezali mpe bongo nde Yesu azalaki Mwana na Nzambe. Alakaki ete Akotinda Ye. Ntango Azalaki kati na mikolo na Ye awa na mokili, mpe bato bakokaki kondima Ye te, Alobaki: "Bolukaluka kati na Makomi, mpo ete bobanzi ete na Yango bokozua Bomoi na Seko, mpe Yango nde ezali kotatola mpo na Ngai. Soki Nasali misala ya Tata na Ngai te, wana bóndimela Ngai te. Kasi soki bokoki kondima Ngai te, bondima misala oyo Nazali kosala, mpo ete yango ezali kotatola Nani Ngai nazali."

46 Ee, sima, na eleko na Wesley, misala oyo asalaki etatolaki mpenza nani ye azalaki.

Na eleko ya Luther, ná bobongisi, ee, solo mpenza yango etatolamaki oyo ye azalaki.

Na mikolo ya Pantekote, kozongisa makabo, kozongisama ya makabo, koloba minoko na sika mpe kobengana milimo mabe, mpe makabo, yango etatolaki. Liseki ezalaki te na ntina na yango. Bato balobaki, na ebandeli ntango likambo yango ebandaki ... Natangaki babuku likolo na lisolo ya Pantekote. Balobaki: "Ekoki koumela ntango molai te. Ekozikisama nye." Ezali kokoba kopela. Mpo na nini? Ezali mpo ete bokoki koboma yango ata moke te. Nzambe alobaki ete ekozala wana. Ezali eteni moko ya Liloba, mpe bokoki kolongola yango te.

Bongo ntango Mwasi na libala abengami, ndenge nini bino bokoki kolongola yango? Ezali emoniseli ya

komonisama ya Liloba oyo ezali solo. Mpe tozali kobika na mokolo yango; nkembo na Nzambe; emoniseli ya libombami na Ye moko.

47 Sikawa, Konetolama ezali bobele ... Konetolama oyo tozali kolobela, ezali bobele mpo na Mwasi na libala. Bobosana te ete Biblia elobi: "Bakufi mosusu bazongaki na bomoi te mpo na mibu nkoto." Konetolama monene oyo! Soki konetolama ezali, baninga, biso tozali wapi? Biso tokosala nini? Tozali kobika na eleko nini? Tozali na elaka nini? Konetolama ekozala. Biblia elobi ete ekozala. Mpe yango ekozala bobele mpo na baponami, mpo na Mwasi Moponami, Mwasi ya Libala na mokolo oyo, oyo abimi, Lingomba.

Lilo ..., liloba oyo *lingomba*, elingi koloba "kobengama libanda na." Lokola Mose abengaki ekólo libanda na ekólo mosusu, Molimo Mosantu azali kobenga Mwasi na libala libanda na lingomba; Lingomba moko libanda na lingomba mosusu, bandimi kouta na bibongiseli nyonso mpo na kosala Mwasi na libala, Nzete-Mwasi na libala. Elobami kati na—na bande, Nzete-Mwasi na libala. Mwasi na libala oyo abimi, abengami, mpe ye nde azali kosala Nzete-Mwasi na libala. Mwa—Mwasi na libala, ezali bobele Ye nde akokende na Konetolama; bobele ye, eloko mosusu te kasi bobele Mwasi na libala, baponami oyo bayebamaki na Nzambe uta na ebandeli, mimboto ya molimo ya Tata.

Natelema naino awa miniti moke. Mpe nazali kokoma motema mokuse, kokanisáká ete nakobomba bino, nakombomba bino mpo na ntango molai mpenza.

48 Kasi botala, botala, moko na moko na bino. Boyebi ete mibu na mibu liboso na bino kobotama, bozalaki kati na tata na bino lokola momboto? [Losambo elobi: "Amen." — N.D.E.] Ya solo. Momboto, momboto, ezalaki kati na tata na yo; eutaka na nzoto ya mobali, ya mwasi te. Bomoni? Mwasi apesaka likei, mabelé epai wapi momboto ekolónama. Kasi momboto eutaki na ta ... Sikawa, toloba, kati na tata na ngai ...

To, mwana na ngai ya mobali oyo afandi awa, ntango nazalaki na mibu zomi na motoba, mwana na ngai ya mobali azalaki kati na ngai. Nayebaki ye te, kasi azalaki wana. Sikawa, na nzela ya mabelé epai ya kolóna, na nzela ya libála ya bulee, akómi na elilingi na ngai. Nayebi ye. Nakoki kozala na boyokani na ye. Mpe ye aye mpenza na ntango oyo elongobani.

49 Bongo mpe ezali mpo na yo, soki ozali na Bomoi na Seko, ozalaki ... kati na Nzambe liboso ete mokili ezala. Ozali eteni, mwana na Nzambe, likoki moko ya Nzambe. Ayebaki eleko mpenza oyo olingaki koya. Abongisaki yo liboso mpo na kozua esika wana na eleko oyo, mpe moto mosusu akoki kozua esika yango te; ezali na ntina te ata soki bamekoli bazali mingi mpe makambo mosusu. Osengeli kozala wana, mpo Ayebaki ete okozala wana. Sikawa, omonisami polele. Sikawa okoki kozala na bondeko elongo na Ye, mpe yango nde Ye Alingi. Azali na mposa makasi ya bondeko, ya kosambelama. Kasi soki bomoi na yo ezalaki likoki moko ya Nzambe te uta na ebandeli, ozali bobele komekola Boklisto. Bomoni? Ekozala na efúku na efúku na bango, bakozala bobele komekola Boklisto.

50 Ezali na maloba moko nalobaki kala mingi te. Nazalaki kotala Ndeko Demos Shakarian awa, ntango bazalaki kosangisa mimboto ya bibwele, natalaki milangi esika basangisaka yango mpe bongo na bongo, wana minganga ya baniama bazalaki kozua yango, mpe nazalaki kotala makambo yango.

Na kosopama moko ya mái ya mobali, ezalaka na pene na milioni moko ya mimboto oyo ebimaka na nzela ya mobali mbala nyonso. Mpe pene na milioni moko ya makei ebimaka uta na mwasi na—mbala moko. Kasi bino boyebaki ete, nakati na mimboto mikie mikie nyonso wana oyo ezali kotambola tambola, efúku na yango, bobele moko nde ebongisami mpo na bomoi, mpe likei bobele moko nde ezali mabele malamumu mpo na koyamba momboto? Mpe mwa momboto moke wana ekoluka nzela katikati na mimboto mikie mikie misusu nyonso, ekomata likolo na mimboto misusus oyo ekokani mpenza na ye, mpe ekomata likolo na oyo, mpe likolo na oyo kuna, mpo na koluka likei oyo ya malamumu mpe ekota kati na yango. Mpe na sima, bamosusu nyonso bakokufa. Ee, toloba na ntina na mbotama na nzela ya mongondo, oh, ezali ata ndambo libombami lokola mbotama ya nzoto te, nboni yango ekanama liboso, ebongisama liboso na Nzambe!

Sikawa, na ebandeli, kalakala, eleki mibu na mibu liboso ete ntango ébanda, soki yo ozali Moklisto oyo abotami mbala na mibale, na mpokwa oyo, ozalaki kati na Nzambe, Tata na yo. Yango nde ntina, ntango oyei kati na bomoi oyo awa mpe oyamboli Boklisto, ee, mpe makambo nyonso ezali kotambola malamumu te, ozali komituna mpo na nini boye, mpo na nini nyonso wana. Omituná mituná na ntina na yango. Kasi, mokolo moko, Eloko moko ebetaki yo. Ezalaki nini? Bomoi oyo ezalaki kuna na kati, uta na ebandeli. Mpe soki e ...

51 Boyebi lisolo na ngai moke na ntina na mpongo oyo azalaki koluka, mama mpongo oyo azaláki koluka mwana na ye. Boyóká ngai koteya likolo na yango, ndenge likei ya mpongo moke wana epasukaki na nse na soso. Kasi ye, ezaleli na ye ya koluka koleisa bango—bana ya soso, mwana mpongo oyo azalaki kokoka kolia bongo te, mpamba te azalaki nsoso te mpo na kobanda. Nzokande, azalaki kati na etonga ya ba-nsósó, mpe azalaki kolanda mama nsósó. Kasi ye mama nsósó azalaki koluka bilei na mabelé kuna

na lopango ya bibwelé mpe bongo na bongo, mpe mwana ya mpongo akokaki koyíkela yango mpiko te. Kasi ntango nyonso azalaki koganga mpe nyonso wana, bana nsósó nyonso bazalaki kokende, na bongo ye mpe azalaki kokende. Kasi mokolo moko ...

Mama na ye ayebaki ete abwakaki makei mibale, moko te. Likei mosusu esengelaki kozala esika moko. Akendeki koluka yango, azalaki kopumbwa, kobalukáká zonga-zonga. Nsukansuka akomaki likolo na lopango ya bibwele, mpe kuna amonaki mwana na ye, mpe agangaki na mongongo makasi. Asosolaki ete eloko oyo ekokanaki, ezalaki mongongo wana. Yango nde eloko azalaki koluka, bomoni, mpe asosolaki na bongo ete azalaki nsósó te. Azalaki mpongo.

Mpe ezali bongo mpo na Moklisto nyonso oyo abotami mbala na mibale, ntango oye. Ezali na ntina te soki osangáná na bibongiseli boni, bankombo boni, okomá nkombo na yo na babuku mpe makambo ya lolenge wana. Ntango Liloba ya solo ya Nzambe etatolami mpe emonisami polele liboso na yo boye, okososola ete ozali mpongo, kaka wana. Mpamba te, koganga nyonso ya mama nsósó, "Sanganá na oyo boye mpe na oyo kuna, mpe kende na ngámbo oyo mpe na ngámbo oyo kuna," ezali bolema. Ezali ya solosolo, kobakisa Liloba likolo na Liloba.

52 Ntango momboto ekoti kati na libumu ya—ya mwasi, ezuaka te ... Yo, okómaki te momboto ya moto kouta na tata na yo, mpe na sima momboto kouta na mbwa, mpe na sima kouta na nyau, mpe na sima kouta na nsósó. Ezalaki na mobimba na yango momboto ya moto.

Mpe Nzoto ya Yesu Klisto, Mwasi na libala, Akozala eteni ya Nzoto na Ye. Oyo eko ... Azalaki Liloba, mpe Mwasi na libala akosengela kozala Liloba; Liloba ebakisami na Liloba, ebakisami na Liloba. Kosembolisama ya Luther, kobulisama ya Wesley, libatisi ya Molimo Mosantu ya Pantekote, kozongisama ya makabo, mpe nyonso oyo etikali ezali kokende elongo. Bomoni? Esengeli kozala Liloba likolo na Liloba, momboto likolo na momboto, Bomoi likolo na Bomoi, mpo na kobimisa epimelo mobimba ya Mwasi na libala ya Nkolo Yesu Klisto. Sikawa kobosana te ete ozalaki likoki moko.

53 Bongo sikawa, likambo ezali ete nsima na biso komona makambo oyo, ete Klisto azali koya mpo na Mwasi na Ye ya libala, sikawa, ndenge nini kokota kati na Mwasi na libala yango? Yango nde motuna.

Bato mingi balobaka: "kota na losambo na biso." Moko na bango alingi libatisi ya lolenge moko boye. Mosusu alingi kosala *boye to boye*. Moto moko akoloba: "Bosengeli koloba minoko na sika, soki te bozali na Yango te." Mosusu akoloba: "Bosengeli na bino koloba minoko na sika te." Oyo alobi: "Esengeli ete bobina kati na molimo." Oyo alobi: "Bosengeli koganga." Oyo, "Ayoki koningana." Ezali na yango malamumu, kasi ata bongo, nyonso ezali mabe.

Ndenge nini mobali oyo azali ... to mwasi, to mwana na Nzambe, oyo abotami na Molimo na Nzambe, aboya Liloba na Nzambe? Na ntango Nzambe Ye moko Alimboli Yango mpe alobi: "Oyo ezali Yango. Ngai nalakaki Yango. Yango oyo," kotalisáká Yango polele mpenza ndenge ekoki kozala. Ee, batindami na makasi ete bamona Yango. Bomoni? Ndenge nini Klisto akoki kowangana Liloba na Ye moko? Mpe soki Klisto azali kati na yo, Akoki kowangana Liloba na Ye moko te.

54 Na sima, ndenge nini tokoki kokota na kati na Nzoto yango? Bakolinti ya Liboso 12: "Na Molimo moko banso tobatisami mpo na kosala Nzoto moko, kati na libatisi moko ya Molimo Mosantu." Yango, soki bolingi kokoma yango, ezali Bakolinti ya Liboso 12:13. "*Mpe na nzela ya Molimo moko, biso nyonso tobatisami.*" Mpe Molimo ezali Bomoi ya Klisto. Ezali boye te? [Losambo elobi: "Amen." — N.D.E.] Bomoi ya Klisto! Mpe bomoi ya momboto nyonso ... Ye, Azalaki Momboto-Liloba, Azali komema Momboto na Bomoi. Bososoli yango? Soki yango—soki Bomoi yango ezali kati na Momboto, mpe libatisi oyo ya Molimo Mosantu eye likolo na Yango, esengeli komema Bomoi na Momboto yango.

55 Ndenge nayebisaki bino, awa na Phoenix, kala mingi te. Nazalaki kosolola na Ndeko John Sharrit. Nazalaki kuna, mpe ye alakisaki ngai nzete moko, ya ndímo. Ye—alónaka ndímo mingi. Mpe alakisaki ngai nzete moko oyo ezalaki na lolenge ya mbuma mwambe to libwa ya kokesana. Mpe nalobaki: "Ndeko Sharrit, oyo ezali nzete na nini?"

Alobaki: "Nzete ya malala."

Nalobaki: "Mpo na nini yango ememi ndímo-ya-ngai, lolenge mibale ya malála, na mpe paplemusi?"

Alobaki: "Nyonso ezali mbuma ya ndímo. Babaki yango kobáka."

"Oh," nalobaki, "Namoni. Sikawa, na mobu mokoya, ekobota bobele malala. Zala ..."

"Oh, te. Nzete moko na moko ekobota ya yango moko. Etape moko na moko ekobota mbuma na yango."

56 Mingi kati na bino balóni ya ba nzete ya mbuma boyebi yango, awa na lobwaku ya ndímo oyo. Ekobota ya yango moko. Bobaki etape ya ndímo-ngayi na nzete ya malala, ekobota ndímo-ngayi, mpo ete ezali lolenge ya mbuma ya ndímo. Kasi, yango ekobota mbuma ya ebandeli te.

Mpe yango nde likambo tosali. Tobaki-baki, tokotisi bindimeli, mpe bongo na bongo, tobaki na biloko nyonso awa. Ndenge nini ba-Methodiste bakoki kobota eloko mosusu soki mwana-Methodiste te? Ndenge nini ebongiseli moko boye ekoki kobota eloko mosusu soki mwana ya ebongiseli te?

Kasi soki nzete yango ebimisi etape ya ebandeli, ekobota malala.

Mpe na boye, soki Nzambe asali eloko moko kati na Lingomba, ekozala mpenza ya ebandeli, ekozonga lisusu na Liloba. Ya solo mpenza. Esengeli kozala bongo, mpo Bomoi ezali kati na Nzete, mpe ekobota na lolenge na Yango.

57 Sikawa, ntango tomoni ete, sikawa, lingomba monene wana ekoli kati na bileko, kobotáká mbuma na yango. Mpe ntango bitape bizalaki lisusu kobota te, bazali kokata yango. Na Yoane 15, Ye apapaki mowiti ata moke te, sikawa. Alongolaki bitape, Akataki yango, mpo ete bizalaki kobota mbuma ata moko te. Mpe —mpe biso ...

Yesu alingi mbuma na, mpo na Ye moko. Mwasi na Ye asengeli kobota bana oyo bazali lokola Ye.

Bongo, soki aboti bana te, bana-Mwasi na libala, bana Liloba, wana ezali mwana ebongiseli. Azongeli na bongo bolingo na ye ya liboso mpo na mokili mpe bibongiseli. Mpe akoki te kobota Moklisto ya solo, ya solosolo mpenza oyo abotami mbala ya mibale, mpo ete eloko moko te ezali wana mpo na kobota yango.

Ezali kaka lokola soki okamati etape ya nzete ya ndímo-ngayi mpe obaki yango wana, ekobota ndímo-ngayi, kasi ekoki kobota malála te, mpo ezalaki wana te na ebandeli. Kasi soki yango ebongisamaki na ebandeli, eyebamaki liboso mpe elakamaki na Nzambe, yango esengeli kobota malála. Ekoki kobota eloko mosusu te.

58 Ezali lolenge wana ná Lingomba ya Nzambe na bomoi, ntango ngonga ekokoka. Moto nyonso ... Nzambe ábanda kaka kosala likambo moko, moto nyonso akokamata bale mpe akeyi. Bomoni? Esalemaka ntango nyonso bongo.

Nazalaki kotanga mambi ma kala ya Martin Luther, eleki ntango molai te. Elobamaki: "E... Ezalaki mpenza mpasi te kondima ete Martin Luther akokaki kotemela lingomba Katoliko mpe kozanga kopesama etumbu. Kasi, "elobamaki," likambo ya kokamwa ezalaki ete ye akokaki kotombola motó na ye likolo na molende mabe nyonso oyo eyaki sima na kolamuka na ye, mpe kotikala ata bongo sembo na kobulisama na ye." Bomoni? Makambo nyonso mpenza, bomekoli mpe nyonso, elandaki ye.

59 Botala Madame Semple McPherson, Aimee Semple McPherson oyo azalaki na tempelo wana awa. Bateyi nyonso ya basi bazalaki na mapapu wana, mpe bazalaki komema Biblia lolenge moko na ye, mpe—ezalaki bobele bomekoli ya nzoto!

Bakoki kozala eloko ya ebandeli te. Yango nde lolenge mangomba makoki kozala bongo. Tika kaka losambo moko ezua eloko moko to mosusu kati na engumba, losambo mosusu ekoki koyikela yango mpiko te. Bango mpe bakozua yango. Bomoni? Bazali lisusu ya ebandeli te.

Liloba na Nzambe ezali ya ebandeli. Ezali Liloba, mpe esengeli kobota motindo na Yango; motindo na yango na eleko na Yango, eponamá mpe ekanamá libosoa na Tata, Nzambe.

Na boye, ndenge nini tokokota na Lingomba oyo? "Na nzela ya Molimo moko, biso nyonso tobatisami na Nzoto oyo moko, Nzoto na Klisto," oyo ezali Mwasi na libala, Liloba. "Tobatisami na kati kuna na Molimo Mosantu."

60 Sikawa, totala soki tozali na eleko ya suka, to te. Sikawa tomoni ete, soki totali na Genese na, oh na mokapo ya 5, bokoki mpe kotala na Luka, mpe bokomona ete Enoka azalaki moto ya nsambo kobanda na Nowa. Enoka.

Wana tosimbi momboto na nyoka. Mpamba te, soki Kaina azalaki mwana na Abele, wana Enoka azalaki moto ya mwambe. Bomoni? Kasi esika moko te kati na Biblia elobami ete Kaina azalaki mwana ya Abele ... to Kaina—to Kaina azalaki mwana ya Adama. Mpamba te, Biblia elobi ete "Autaki na oyo ya mabe wana." Mpe Adama azalaki moto mabe te. Bomoni? "Autaki na oyo ya mabe."

61 Sikawa tomoni awa ete Enoka azalaki moto na nsambo uta na Nowa, oyo ezalaki elilingi ya bileko na lingomba. Sikawa, bato nyonso motoba oyo bayaki liboso na ye, bakufaki; kasi Enoka anetolamaki. Enoka anetolamaki, moto na nsambo, kotalisáká ete ezali eleko ya nsambo ya lingomba nde ekozuama na Konetolama. Na boye ntembe ezali te, tozali kati na eleko ya nsambo ya lingomba. Bisu nyonso toyebi yango.

Sikawa, ezali eleko ya lingomba ya nsambo nde Ekonetolama. Misusu nyonso motoba bakufaki. Kasi Enoka anetolamaki, mpo, "Amonanaki lisusu te. Nzambe akamataki ye." Bamosusu nyonso bakufaki, kasi konetolama ya Enoka ezalaki elilingi. Kasi mo—Mwasi na libala ya ntango na suka Akobengama libanda ya ... Akobengama libanda na eleko ya nsambo ya lingomba, akonetolama kozanga koleka na kufa, tozali

sikawa kotatola na ntina na eleko yango. Olálá! Tika totimola sikawa na bozindo mpenza. Bomoni?

62 Sikawa, botala lisusu etaliseli ya bileko nsambo ya ligomba; elobami kati na Emoniseli 10: 7, ete libombami monene ya Buku esengelaki kofungwama na Nsango ya mwanje na nsambo.

Sikawa, ezali na Momemi-nsango moko na likolo, ntango nyonso, mpe momemi-nsango moko na mabele. Liloba oyo *mwanje* na Ngelesa elingi koloba "momemi-nsango." Mpe kati na Nsango na mwanje na nsambo, wana azalaki kosakola, na mosala na ye, "na boye ntango azali koyula lotomo na ye," kasi ntango abandaki te.

Yesu, ntango Abandaki mosala na Ye, Abandaki kobikisa babéli mpe bato na mawa. "Ô, Labi monene oyo! Azali Mosakoli." Bato nyonso balingaki kozala na Ye na lingomba na bango.

Kasi ntango mokolo moko Atelemaki wana mpe alobaki: "Ngai ná Tata na Ngai tozali Moko," wana ezalaki ndenge mosusu. Wana ekomaki likambo mosusu. "Mpe soki bolei mosuni ya Mwana na moto te, mpe bomeli Makila na Ye te, bokozala na Bomoi kati na bino te."

"Ee, Azali momeli makila!" Bomoni? Bomoni? Wana ezalaki eloko mosusu.

Alimbolaki yango te. Basilaki komona komonisama, kotatolama ya Liloba na Nzambe mpo na eleko na Ye, emonisamaki mpe etalisamaki polele epai na bango ete Ye azalaki Momemi-nsango mpo na eleko wana. Mpe Ye asengelaki kolimbola eloko moko te.

Bayekoli wana bazalaki ntango mosusu na makoki ya kolimbola Yango te. Kasi bandimaki Yango, bákoka kolimbola Yango to te. Bafandaki na bango kimia mpe bandimaki Yango. Ndenge nini bakokaki koyeba soki balingaki kolia mosuni na Ye mpe komela Makila na Ye? Ee, ekokaki kosalema te mpo na bango. Kasi bandimaki Yango, mpo babongisamaki liboso. Yesu alobaki ete "Aponaki bango liboso na kozalisama na mokili." Bomoni? Bandimaki yango. Ata bákoka kolimbola yango to te, bakobaki kondima Yango.

63 Sikawa botala; sikawa, na eleko ya nsambo ya lingomba, "Ntango Mwanje ya nsambo abandi koyokisa mongongo na ye, mabombami ya Nzambe masengelaki koyebama kaka wana," Bilembo.

Yango, babongisi ... ezalaki likambo ya ntango. Luther abikaki ntango molai te, Wesley mpe lokola. Bileko biumelaki ntango molai te, babongisi. Bazalaki na nsango na bango ya mokolo wana, mpe bato bakamataki yango mpe bakómisaki yango ebongiseli. Ezali nini?

64 Okoki kolonga ekelamo ata moke te. Mokili ezali ntango nyonso kotatola. Nzambe ayangelaka na boyokani ná ekelámo. Esengeli kozala bongo.

Ndakisa moi. Ntango ebimaka na ntóngó, ezali mwana moke oyo abotami. Ezali na bolembu, ezali na molunge mingi te. Na ngonga ya zomi, asilisi kelasi ya ntei. Na katikati ya mokolo, akoti kati na bomoi. Na ngonga ya misato na nsima ya nzánga, ebandi kokóma mobange. Na ngonga ya mitano, ezali kokufa. Akomi mobange mpe lisusu na bolembu, azali kozonga na nkunda. Ezali nde suka na yango? Ekosekwa lisusu na ntongo molandi. Bomoni?

Botala banzete, ndenge babimisaka nkasa na bango makambo nyonso oyo basalaka. Sikawa tomónaka nkasa kokwea na nzete, mpe kozonga. Nini? Bomoi ezongi kino na mosisá ya nzete. Ezali suka na yango? Ekozonga na eleko ya ebandeli ya molunge, ná bomoi ya sika.

65 Sikawa botala mangomba, ndenge likambo moko wana esalemaki na ntango ya bobongisi makambo. Ebimi. Mbuma wana ya lisangu ekweaki na mabele mpe ekufaki, na minyoko ya bileko ya molili. Ezongaki na mabele. Esengelaki kokufa. Moto nyonso ya molimo akoki komona yango. Soki momboto yango ekufi te mpe epoli te, ekotikala yango moko. Mpe esengelaki kokende kati na mabele na eleko ya molili. Etikalaki wana, esilaki kopola. Mpe uta na yango ebimaki matiti mikie mibale ya lingomba ya ba-Lutherien. Uta na lingomba ya ba-Lutherien, matiti mikie mingi koleka mabimaki, lokola Zwingli mpe bamisusu. Yango ekobaki kino na na motó ya lisangu, oyo ezalaki John Wesley, eleko monene ya bamisionere. Yango ezongaki sima. Libanda na yango eyaki eleko ya kozimbisa, eleko ya ba-Pantekotiste. Mbuma ya lisangu yango, oyo ...

Moto moko azali awa, oyo áсила kolona masangu? Tala lisangu yango, ntango ozali kotala yango malamumu. Ntango ozali kobima libanda kuna mpe koloba: "Nazali na masangu." Emonani lokola ozali na masangu kuna. Fungola yango mpenza na bokebi mpe tala malamumu. Ozali na masangu ata moke te. Ozali na mposo. Yesu akebisaki biso te, na Matai 24:22 ... -minei? "Ete na mikolo ya suka, milimo yango mibale mikozala mpenza pene, na lolenge ete ekopengwisa ata moponami lisangu Yango moko soki ekokaki kosalema." Bomoni? Sikawa botala malamumu. Ezali momemi.

66 Sikawa, Bomoi oyo emataki mpe elekaki kati na Luther, yango nde esalaki Wesley. Bomoi oyo ebimaki na Wesley, yango nde esalaki Pantekote. Bomoi oyo ebimi na Pantekote ezali kosala masangu. Kasi bazali bamemi. Bomoni? Bomoi ya solosolo ezali koleka wana. Nsango ezali koleka wana, kasi Esengeli komata

kino na kati ya masangu. Yango nde ntina masangu ezali komata mpe komema biloko nyonso na Konetolama, awa na likolo. Mwasi na libala, Ye moko auti na eleko moko na moko. Kasi nzete ya bibongiseli ezali kokufa, ezali kokauka mpe kokufa. Bino bomoni, na mikolo oyo ya nsuka, ndenge yango ebandi kolongwa sikawa? Ntango lisangu wana ebandi kokola, na bongo—mposo ebandi kokende mosika na Yango.

67 Tala lisusu malamumu mwa lisangu moke wana. Fungola yango *boye*, mpe talá kati na yango mpo na komona. Ozali na mwa lisangu moke oyo ezali kobima na nse kuna. Esengeli kozua mikroskopu oyo eyeisaka monene mbala ntuku misato mpo na kotala yango, mpo na komona mwa lisangu moke oyo ebandi kosalema kuna na kati. Bomoni?

Ezali na suka kuna na kati, kasi Ebandi kokóla. Sikawa, mposo wana esengeli kozala wana, mpo na kobatela Yango, mpo na kopesa Yango libaku ya kobima. Kasi na sima, ntango Ebandi kokola mpe Nsango ebandi kopanzana, wana mposo ekolongwa na Yango. Mpe Bomoi ekobima kati na mposo yango mpe ekokóta na lisangu. Yango ekokóba bongo! Ezali bongo mpo na eleko moko na moko Ezali—ekoki kolonga lolenge ya bikelamo te. Ezali ... Ezali lolenge ya Nzambe, lolenge Asálaka makambo.

68 Mpe sikawa, yango nde eleko tozali kobika kati na yango sikawa, eleko ya nsambo ya lingomba. Sikawa, nyonso esengeli kotalisama na kati ya mbuma ya lisangu na nsuka, mosusu ezali kozonga. Sikawa, soki bozui Luka mokapo ya 17 mpe na nzela ya 30, Alobaki: "Ndenge esalemaki na mikolo na Sodoma, ekozala lolenge moko na boyei na Mwana na moto, ntango Mwana na moto Akobanda komimonisa." *Komonisa* ezali nini? Ezali komema emoniseli na Ye, ya oyo Ye Azali kati na mokolo oyo. Komonisa epai na bato, Liloba oyo etalisami mpo na mokolo yango. Komonisa epai na bato, na nzela ya komonisama ya Molimo Mosantu, oyo ezali kotalisa ete Yesu azali kobika kati na biso. Mpe bobosana te, Ye Atálísámáki kuna na kati na moto. Moto moko! Alobaki: "Lokola ezalaki ..." Sikawa, Ye atangaki Biblia moko oyo biso tozali kotanga, Ebandeli. Sikawa, tozali komona na mokapo oyo ya buku na Ebandeli, oyo Yesu azalaki kolobela yango.

69 Tomoni kuna ete, wana, ná mokongo na Ye apesi na hema, mpe Sala kati na hema. Alobaki, Atunaki motuna moko. Mpe Sala andimaki te ete likambo yango ekokaki kosalema. Alobaki: "Sikawa, Abalayama, Nakoya lisusu epai na yo na eleko ya bomoi." Bomoni? Mpe Sala, na kati na hema, asekaki na ntina na yango. Ye Alobaki: "Mpo na nini Sala aseki, na hema, nakolobáká: 'Ndenge nini makambo oyo ekoki kosalema?'"

Yesu alakaki. Mpe ezalaki Ye. Abraham abengaki Ye: "Elohim," Mozui-ya-Nguya-Nyonso. Ezalaki nde Ye. Sikawa, Biblia elaki ete ekozonga lisusu na mikolo ya suka. Yesu alobaki bongo. "Mpe ntango bomoni makambo oyo kobanda kokokisama," bobosana te mpenza, ntango likambo oyo ebandi kosalema boye, wana boyebi ete ngonga ebelemi na ekuke.

70 Bótala mokili yango moko. Botala mokili, soki Sodoma ezalaki, yango oyo. Botala libebi oyo bato bakomi na yango. Makanisi na bango ebebi. Bayebi ata te oyo bomoto ezali. Botala batomboki ... [Maloba mazangi na eteni oyo ya bande — N.D.E.] ... mibali ná mibali mpe basi ná basi kosangisa nzoto, mpe makambo mosusu.

Mpe botala basi na biso, mobulu nini oyo bazali kosala. Botala mobulu oyo ya bozangi bomoto, ya mbindo kati na basi na biso. Mpe ezali kaka te kati na ...

Bokoloba: "Ezali ba-Methodiste." Ezali mpe ba-Pantekotiste. Ezali bango nyonso.

Botala mibali na biso. Na esika ya kokangama na Liloba ya Nzambe, bango bazali kokangama na mwa momesano moko ya ebongiseli. Bazali kokangama na yango na esika ya kobima ntango bazali komona Nzambe Komitalisa polele. Ntina ezali ete bazali bakufi miso. Bakoki komona Yango te. Bakomona Yango soko moke te.

Sikawa botala likambo nini ezali kosalema awa na kati, wana tozali kosala mbangu.

Nabanzi ete mwasi wana alingi biso tobima. Namoni ye kosala elembo na loboko na ye, to eloko moko boye mpo na kotalisa ete alingi biso tobima awa, na bongo ekozala malamumu tosala nokinoki.

71 Boye sikawa botala Enoka, etaliseli ya Lingomba. Awa, azali mpe etaliseli ya eleko ya nsambo ya lingomba. Bokoki kokanisa yango? Eleko ya nsambo ya lingomba! Botala. "Na mongongo ya ..."

Bato boni bandimi ete batindami bazalaki nsambo mpo na bileko nsambo ya lingomba? Oh, biso nyonso tondimi yango, soki tondimi Biblia. Soki biso tondimaka Biblia te, na ntembe te, tokondima yango te. Kasi, bazalaki.

Sikawa tozali kobika na eleko ya nsambo ya lingomba. Mpe ntango Biblia elobi ete eleko oyo ya nsambo ya lingomba ... elobi ete "Ntango motindami na eleko ya nsambo ya lingomba abandi koyula Nsango na ye, ete mabombami ya makambo nyonso oyo mabebisamaki na kati na bileko, makomonisama

na ntango yango.” Tomoni yango awa, Mwana na moto koya kati na bato na Ye mpe kosala mpenza, Azali kotatola Nsango na Ye lokola Ye alobaki ete Akosala. Tomoni yango awa, na eleko ya suka oyo.

Mpe kokengela nsambo, ezali lokola na kokengela nsambo, moto moko ayaki. Ayaki na kokengela ya liboso te, ya mibale te, ya misato te, ya minei te, kasi ayaki na kokengela ya nsambo. Wana ezalaki Enoka, oyo ya nsambo, oyo anetolamaki. Mpe Nowa, lokola azali elilingi ya Bayuda oyo batikalaki na bomoi, asengelaki komemama likolo ya mai. Sikawa, na ntango ya kala na Biblia, lokola tozali kolobela kosenzela ya butu. Mpe butu ekabwanaki na ba ngonga te, na ntango ya Biblia.

72 Sikawa, boyoka na bokebi. Mpo nakosala noki sikawa, mpamba te bazali na bosenga ya esika oyo. Te. Biblia ekabulamaki te, to—to ...

Butu ekabulamaki na ngonga te, na ntango ya Biblia. Yango ekabulamaki na kokengela ya butu. Ezalaki na kokengela misato. Sikawa, kokengela ya liboso ezalaki kobanda na ngonga ya libwa ya butu kino na zomi na mibale ya butu. Kokengela ya mibale ezalaki kobanda na ngonga ya zomi na mibale ya butu kino na ngonga ya misato. Mpe kokengela ya misato ya butu ezalaki kobanda na ngonga ya misato kino na ngonga ya motoba ya ntongo. Sikawa tozali na yango misato, misato mbala misato esali libwa, oyo ezali motango ya kobonga te. Boye tozali kozonga na nsambo mpo na Konetolama, oyo ekosalema, nandimi, kati na ngonga motoba ná nsambo ... to motoba ná libwa mokolo moko na ntongo. “Mpamba te kelelo ya Nkolo ekoyula.”

Na ntongo wana ya pole mpe ezangi mapata, ntango bakufi kati na Klisto bakosekwa,
Mpe bakokabola nkembo ya lisekwa na Ye;
Ntango baponami na Ye bakoyangana na bandako na bango kuna na lola,
Ntango bankombo ekobengama kuna na likolo, nakozala wana.

73 Liloba oyo konetolama, esalelami ata te na kati na Biblia. Tozali bobele kotia liloba yango wana. Biblia elobi nde: “komema likolo; komemama likolo.” Tokotanga awa na Batesaloniki ya Mibale ... To, Batesaloniki ya Liboso, ezali molongo ya Konetolama monene oyo ekosalema na mikolo ya suka. Boyoka yango awa. Tokobanda awa na nzela ya 13.

... Nzokandé, biso tolingi te, bandeko, ete bozanga koyeba makambo oyo etali bato oyo balali, Mpo bozala na mawa te lokola bato mosusu oyo bazangi elikia.

Mpamba te, soki tondimi ... Klisto akufaki mpe Asekwaki lisusu, mpela moko, elongo na Ye, Nzambe akozongisa na bomoi baoyo balali kati na Yesu.

Zambi biso tozali koloba na bino na nzela na liloba ya Nkolo, ete biso baye tozali na bomoi mpe totikali kino na boyei na Nkolo, tokoleka liboso ... (Liloba oyo koleka liboso elingi koloba “kopekisa.”) ... na baoyo balali te.

Mpo Nkolo ye moko Akokita uta na likolo ...

Sikawa boyoka malamumu.

... Nkolo Ye Moko Akokita longwa na likolo na koganga makasi, mpe na mongongo na mokóló na banzelu, mpe na ... kobeta na kelelo na Nzambe; mpe bakufi kati na Klisto bakosekwa liboso: ...

74 Sikawa nalingi ete bomona likambo monene oyo ezali kosalema awa sikawa. Bózanga likambo oyo te. Bomoni? Sikawa botala. Liloba elobi awa, na Batesaloniki ya Mibale, ete makambo mazali misato. Botala. Kobanda na molongo ya 13 kino na oyo ya 16, ezali na makambo misato oyo esengeli kosalema liboso ete Nkolo Ye moko Amonana. Nokinoki sikawa, mpo tosilisa. Bomoni? Eloko ya liboso oyo esalemi ... Botala: koganga makasi, mongongo, kelelo. Tótanga Yango sikawa mpe totala soki ezali ya solo. Bomoni?

“Mpamba te Nkolo ye moko (molongo ya 16) Akokita longwa na likolo na koganga makasi, mpe na mongongo na mokóló na banzelu, mpe ... na kelelo na Nzambe: ...

75 Makambo misato mazali kosalema. Mongongo ... Koganga makasi, mongongo, kelelo, esengeli kosalema liboso na Yesu komonana. Sikawa, koganga makasi ... Yesu azali kosala makambo nyonso misato wana na ntango Azali—Azali—Azali—Azali kokita.

Koganga makasi, koganga makasi ezali nini? Ezali Nsango oyo ezali kosakolama liboso, Lipa ya Bomoi oyo ezali kobimisa Mwasi na libala.

Sikawa, Nzambe azali na lolenge moko ya kosala makambo. Mpe Abongolaka lolenge na Ye ya kosala te. Abongolaka lolenge na Ye ya kos ... Azali Nzambe oyo abongwanaka te. Na Amose 3: 7, Alobaki: “Akosala likambo moko te na mokili kino ete Amonisa yango na basali na Ye basakoli.” Mpe kaka ndenge Alakaki yango, Akosala yango.

76 Sikawa, toleki na bileko ya lingomba. Kasi elakelamaki na biso ete na mikolo na suka, engebene na Malaki ya 4, mosakoli moko akozonga lisusu na mokili. Ya solo. Botala lolenge na ye, ndenge nini akozala. Azali ntango nyo ...

Nzambe asaleli molimo yango mbala mitano: mbala moko kati na Eliya; kati na Elisa; kati na Yoane Mobatisi; mpo na kobenga Lingomba ete ébima, mpe mpo na Bayuda oyo batikali. Mbala mitano: "ngolu," Y-e-s-u, k-o-n-d-i-m-a, mpe ezali motángo ya ngolu. Bomoni? Malamu.

77 Sikawa, bobosana te, Nsango elakamaki. Mpe lokola mabombami nyonso oyo ekotisamaki mpenza mobulu na nzela ya etonga ya bakonzi ya lingomba, ekosenga ete mo—mosakoli moko oyo auti mbala moko epai na Nzambe amonisa Yango. Mpe yango mpenza nde likambo Alakaki kosala. Bomoni?

Sikawa, bobosana te, "Liloba na Nkolo eyaka epai na mosakoli," kasi epai na moto ya teoloji te. Mosakoli, azali motalisi ya Liloba na Nzambe. Akoki koloba eloko moko te; akoki koloba makanisi na ye moko te. Akoki bobele koloba makambo oyo Nzambe amonisi. Ata mosakoli Balama ntango amekamaki mpo na komiteka, koteka makoki na ye, alobaki: "Ndenge nini mosakoli moko akoki koloba eloko mosusu soki ezali oyo Nzambe atie na monoko na ye te?" Ezali eloko oyo Nzambe asalaka, oyo ezali kopekisa yo oloba eloko mosusu. Mpe yo obotami lolenge wana. Okoki bobele kosala ...

78 Lokola Soki okoki koloba: "Na—na—nakoki kofungola miso te," na ntango oyo ózali kotala. Bomoni? Okoki te. Okoki kosembola loboko na yo te, na ntango oyo okoki kosala yango. Bomoni? Okoki kozali mbwa te na ntango ozali moto. Bomoni? Osalemá se bongo.

Nzambe mpe lokola, ntango nyonso, na bileko, na nzela ya Yisaya, Yilimia ná bamosusu, Eliya, kati na bileko bileká. Ntango etonga ya bakambi ya mangomba bazali kobebisa mpe kosangisa makambo nyonso, Nzambe azalaki kotinda mosakoli, kobimisa ye uta na esika oyo eyebani te. Azalaki kati na makambo na bango te, mpe azalaki bobele koloba Liloba na Ye. Na nsima azalaki kolongolama; bazalaki bato ya makambo makasi oyo batelemi mpenza na Bosolo ya Nzambe. Mpe ezalaka ntango nyonso ndenge wana nde okoki koyeba ye. Alobaki: "Soki moto moko kati na bino azali moto na molimo to mosakoli ..."

79 Sikawa, basakoli. Na kati na Losambo, "likabo ya lisakoli" ezalaka; kasi mosakoli akanamaki mpe abongisamaki liboso mpo na eleko. Bomoni? Iyo, mbuta muntu. Sikawa soki lisakoli moko epesami, bato mibale to misato basengeli kofanda mpe kotala soki ezali solo to te, liboso ete losambo éyamba yango.

Kasi moto moko te azalaki kosala bongo mpo na mosakoli, mpamba te ye azalaki—azalaki mpenza Liloba na Nzambe. Azalaki Liloba wana na eleko na ye. Bomoni, Nzambe komitalisa. Sikawa, Nzambe alakaki ete Akotindela biso lisusu yango na mikolo na suka, mpo na kobimisa Mwasi na libala libanda na potopoto ya mangomba oyo, na lolenge bobele moko oyo ekoki kosalema.

80 Yango kosalema soko moke te; lingomba ekoki koyamba Klisto te. Bisó, ba-Pantekotiste, tokoki te kokoba komema Nsango oyo na lolenge oyo lingomba ezali kati na yango lelo. Ndenge nini tokoki kokokisa yango na ntango na suka na lolenge bazali lelo, na ntango moto nyonso azali kotelemela moto mosusu, mpe makambo mosusu nyonso na oyo etali lingomba? Oh, mawa! Ezali mpenza mobulu. Basili kokoma bibongiseli. Mpe ata na ntango nini ... Nazali kosenga na moto nyonso ya mambi na kala a—a—atalisa ngai soki ezali bongo te. Mbala nyonso nsango moko ezalaki koteyama na mokili, mpe ntango bazalaki kokomisa yango ebongiseli, ezalaki kokufa kaka wana. Mpe Pantekote esalaki likambo moko oyo bango nyonso basalaki, Pantekote oyo ebimaki.

81 Bino, ba-Assemblée de Dieu, ntango batata mpe bamama na bino babimaki na bibongiseli kuna na ntango ya Lisanga Monene ya kala, bagangaki mpe bakumisaki Nzambe, mpe balobaki kotelemela makambo yango. Nsima bozali kobaluka, "lokola mbwa azali kozongela bisánza na ye, mpe ngulu potopóto na ye," mpe kosala likambo moko oyo bango basalaki. Mpe sikawa bokomi mpenza bato na mangomba na lolenge ete bokangi mabumu ya mawa na bino. Esengeli mpenza kozala na kalati ya bondeko liboso kutu ya kosangana na bino elongo.

Bino bato ya Bonzambe moko, Nzambe apesi bino nsango ya lolenge wana, mpe na esika ya kokende liboso, kokoba mpenza na komikitisa mpe kokende liboso, bino bomilongoli mpe bokómisi etonga na bino ebongiseli. Mpe bino nyonso bokómi wapi? Kati na katini moko. Ya solo.

Kasi Molimo na Nzambe ezali kokoba kokende liboso. "Ngai Nkolo nalonaki yango. Nakosopela yango mai, butu na moi. Mpo ete ba mosusu ba ..." Abongisaki makambo oyo mpo ete ezala, mpe Asengeli kotinda Oyo.

82 Likambo ya liboso oyo ezali kosalama ntango Abandi kokita longwa na Likolo, ezali koganga makasi. Ezali nini? Ezali Nsango, mpo na kosangisa bato elongo. Nsango moko ezali kosakolama liboso. Sikawa ezali ntango ya kobongisa miinda: "Bótelema mpe bobongisa miinda na bino." Ezalaki kokengela ya boni? Ya nsambo, ya motoba te. Ya nsambo: "Tala, Mobali na libala ayei. Botelema mpe bobongisa miinda na bino." Mpe basalaki yango. Bamosusu kati na bango bamonaki ete bazalaki na Mafuta ata moke te kati na miinda na bango. Bomoni? Kasi ezali eleko ya kobongisa miinda.

Ezali ntango ya Malaki ya 4. Oyo Ye alak ... Ezali Luka 17. Ezali—ezali Yisaya- ... Masakoli nyonso oyo mpo ete ekoza kuzala na molongo mpo na mikolo oyo, kati na Makomi, tomoni yango kokokisama kaka awa. Eloko moko te ...

83 Tozali komona makambo oyo kosalema, bandeko na ngai mibali mpe basi. Mpe Nzambe na Likolo ayebi ete nakoki kokufa na eteyelo oyo ata sikawa. O—osengeli bobele kotambola mwa moke. Ezali mpenza ... Ezali kitoko, ntango omoni Nzambe kokita uta na Lola, kotelema liboso na bitonga ya bato, mpe kotelema wana, komimonisáká bobele lolenge Asalaka yango. Mpe yango ezali Solo, mpe Biblia oyo efungwami. Bomoni? Ya solo. Tokómi wana.

Mpe mimesano ya bibongiseli ekufi. Esili. Ekotelema lisusu te. Ekotumbama. Yango nde bosálaka na mposo na elanga. Bokima mosika na yango. Bokota kati na Klisto. Boloba te: “Nazali moto ya ba-Methodiste. Nazali moto ya ba-Batiste. Nazali moto ya ba-Pantekotiste.” Yo kota nde kati na Klisto.

Soki ozali kati na Klisto, Liloba moko te ezali oyo ekomami na kati Awa oyo yo okozanga kondima. Ezali na ntina te likambo moto mosusu alobi. Mpe na sima Nzambe azali komonisa likambo yango polele. Mpo ete, yo, ntango Asopi Molimo likolo na Liloba, nini esalemi? Kaka lokola kosopa mai na momboto nyonso. Yango ekobika, mpe Ekobota engebene na lolenge na Yango.

84 Yo okoloba: “Nazui libatizi ya Molimo Mosantu.” Yango elingi koloba te ete obikisami, ezali mosika na yango.

Tala awa. Ozali na biteni misato. Ozali bongo. Kati na mwana mobali moke oyo, ezali na bomoto ya kati, oyo elandi ezali molimo, mpe na nsima ezali nzoto. Sikawa, ozali na biyokeli mitano kati na nzoto oyo, mpo na kokota na boyokani ná ndako na yo ya mokili. Yango ezali na boyokani ná makambo oyo etikali te. Ozali na biyokeli mitano ya molimo, *awa*: bolingo mpe lisosoli, mpe bongo na bongo, kati na yango. Kasi awa na kati nde esika ozali kobika. Yango nde oyo yo ozali.

Yesu alobaki te ete “Mbula enokaka likolo ya bayengebeni ná bato mabe?” [Losambo elobi: “Amen.” — N.D.E.] Soki oloni matiti mabe awa mpe masangu kuna, mpe osopeli yango mai, mpe otika yango na mabele oyo ezali na vitamini ná mpe biliko ya bongo, yango nyonso mibale ekobika na mai moko wana te? [“Amen.”] Ya solo mpenza. Ee, ezali nini? Moko na bango ekobimisa matiti mabe, mpo ete yango nde nyonso oyo ye azali. Matiti mabe ekotombola maboko mpe ekosepela kaka lokola masango.

85 Biblia elobi te ete: “Na mikolo na suka, baklisto ya lokuta bakoya? [Losambo elobi: “Amen.” — N.D.E.] Ezali te “Yesu ya lokuta,” sikawa. “Ba-Klisto ya lokuta,” bapakolami, bapakolami ya lokuta na oyo etali Liloba; bazali na kopakolama ya bibongiseli, kasi ya Liloba te.

Mpamba te, Liloba ekopesa litatoli na ntina na Yango moko. Ezali na ntina ya eloko mosusu te. Ekopesa litatoli epai na Yango moko.

“Mpe bapakolami ya lokuta bakoya.” Bozali na bande na ngai likolo na yango. Mpe bapakolami yango ...

Oh, soki okoki kobenga moko na bango, olobi: “Oh, yo, ozali nde Yesu moko?”

“Oh, soko moke te.” Bakondima yango te.

Kasi ntango ekomi na: “Oh, nkembo! Nazali na kopakolama!” Mpe ezali kopakolama ya solosolo. Bobosa na te, Kaifa azalaki na Yango lokola, mpe asakolaki. Balama mpe azalaki na Yango, ye mpe asakolaki.

Kasi yango ezali na eloko moko ya kosala te na oyo ezali na kati. Loba kaka soki yango ezalaki momboto na Nzambe, makila na Ye longwa na ebandeli, mpe ekanamaki liboso, osili kobunga. Ata soki ogangi ndenge nini, olobi minoko ya sika, opoti mbangu, ogangi. Yango ezali na eloko moko te ya kosala.

Lititi mabe akoki kolikia kaka lokola bamosusu nyonso. Nasílá komona bapagano kotelema, mpe koganga, koloba minoko na sika, mpe—mpe komela makila na mokuwa ya motó ya moto, mpe kobenga zábolo. Bomoni? Na boye okoki te ... Mayoki nyonso mpe biloko mosusu, bosana yango.

Ezali nde motema na yo kati na Liloba oyo, mpe Liloba ezali Klisto. Mema yango kuna na kati, mpe tala Yango moko komitalisa, ndenge Ezali kofungwama lokola momboto nyonso mosusu, mpe Komisakola Yango moko mpo na eleko oyo Ezali kobika kati na yango.

86 Luther akokaki komema eloko mosusu te kasi bobele matiti mikie mikie. Bamisusu bakokaki komema makambo misusu wana. Tozali sikawa na eleko ya masangu.

Luther, ba-Lutherien ya solosolo basengelaki kobimisa Luther ya solo. Pantekote ya solosolo esengelaki komema pantekote ya solosolo. Esili. Kasi tosili koleka eleko wana, mpe tozali kokoba.

Boyebi, lingomba Katoliko ebandaki na pantekote? Mpe soki lingomba ya ba-Pantekotiste ekowumela

mibu nkoto mibale, ekozala mpenza mabe koleka lolenge lingomba Katoliko ezali lelo. Ya solo mpenza. Nazali koloba yango na bandeko na ngai mibali ná mpe bandeko na ngai ya basi, oyo nalingaka. Mpe Nzambe ayebi yango. Kasi bobosana te, baninga na ngai, nakokutana na bino kuna na Kosambisama. Mpe yango ekoki kozala lisusu mosika te. Nasengeli kopesa litatoli ya oyo Solo ezali.

87 Ntango nakendeki na mayangani elongo na bino, kobondeláká mpo na babeli, ezalaki malamamu. Kasi, ntango nayákí na Nsango! Soki Nsango moko eteyami, ezali Nsango ya solo ...

Soki ezali ya solo, makamwisi ya solosolo ya Nzambe, mpe atikali bobele kati na ebongiseli yango, boyebi na bongo ete azali ya Nzambe te, mpamba te likambo yango esilá kosakolama.

Yesu akendeki mpe Abikisaki babeli mpo na kobenda bokebi na bango, ya bato, na nsima Nsango na Ye eyaki. Ezali solo.

Esengeli kozala na eloko moko oyo Nzambe alingi kotalisa. Azali bobele ... Lobiko na nzoto kouta na Nzambe, makamwisi lokola wana, kaka mpo na kobenda bokebi ya bato. Likambo ya motuya kati na yango ezali nde Nsango. Ezali nde yango, oyo euti na kati *awa*. Azali koluka ete bato batyela Ye motema, na yango bakofanda mpe bakoyoka Ye, bomoni, mpo ezali na bamosusu oyo babongisami mpo na Bomoi.

Ndambo na mbuma ya masangu, ekweyaki na mabelé, bandeke baliaki yango. Mpe misusu mikweyaki kati na ba-nzube. Mpe eteni mosusu ekweyaki na mabelé oyo ebongisamaki, ebongisamaki liboso, mpe yango ebotaki.

88 Sikawa, likambo ya liboso, ezali koyulama ya kelelo. Eloko ya liboso ezali kelelo mpe ... to mongongo ... Koganga makasi; na sima mongongo moko; na sima kelelo.

Koganga makasi: motindami azali kobongisa bato.

Likambo ya mibale ezali mongongo ya lisekwa; mongongo moko wana, oyo, mongongo makasi na Santu Yoane 11:38-44, oyo ebengaki Lazalo libanda na nkunda.

Kosangisa Mwasi na Libala elongo; mpe na nsima lisekwa ya bakufi, bomoni; mpo na kamatama na konetolama. Sikawa botala makambo misato yango kosalema. Oyo elandi ezali nini? Ezalaki kelelo. Mongongo ... Koganga makasi; mongongo; kelelo.

89 Sikawa, likambo ya misato, ezali kelelo. Oyo, ntango nyonso, na Elámbo na Bakelelo, ezali kobenga bato ete baya na elámbo. Mpe wana ekozala Elambo ya Mwasi na Libala, Elambo ya Mwana na Mpaté ná Mwasi na Libala na likolo. Bomoni?

Likambo ya liboso oyo ezali koya ezali Nsango na Ye, mpo na kosangisa Mwasi na libala. Likambo oyo elandi ezali lisekwa ya Mwasi na Libala oyo alali; o—oyo akufaki kalakala na bileko mosusu, bakozwamna na konetolama elongo. Mpe kelelo, Elambo na likoló, na mapata. Ee, yango nde likambo oyo ezali kosalema, baninga.

Tokómi mpenza wana, tobelemi sikawa. Likambo bobele moko ezali ete Lingomba oyo ezali kobima, esengeli kotiana liboso na Mwana, mpo na kotela.

Ebuki mbuma monene ekoya na mwa ntango moke. Mbuma ekotumbama, banzete, kasi mbuma ekosangisama na ebombelo na Yango. Bomoni?

90 Bozali bakufi miso te. Bozali—bozali bato ya mayele mpenza.

Mpe soki nátélémaka awa mpe náloba makambo oyo mpo na kosala mabe? Nazali koloba Yango mpo Ezali Bomoi, mpo ete nazali na mokumba epai na Nzambe ya koloba Yango. Mpe nasengeli koloba Yango, ná Nsango na ngai. Ntango nyonso oyo tozalaki na kobikisama na nzoto mpe bongo na bongo, nayebaki ete yango ezalaki bobele mpo na kobenda bokebi ya bato, ete Nsango elingaki koya na sima. Mpe Yango oyo. Mpe Bilembo Nsambo bifungwami, mabombami wana, kotalisáká makambo oyo, yango nde likambo oyo esalemi. Nayebaki yango te.

Kasi bato mosusu batelemi awa sikawa, bazalaki mpenza elongo ná ngai. Nzoka nde, bino nyonso bosila koyoka ngai koteya liteya wana: *Mbuta Muntu, Tokómi Ngonga Nini?* Na ntongo wana, kaka na esika oyo Elobamaki ete Ekozala, Banje nsambo babimaki wana, batelemaki wana, uta na Lola. Mpe wana ezalaki Bango komata, mpe mopepe makasi ezalaki komema Bango kuna likolo, totelemaki wana kotaláká bango lokola Bazalaki kokende, bato na zebi bakangaki foto na yango, na ekolo mobimba kino na Mexique.

91 Mpe kuna, ezalaki ngai kotala, mokolo moko, ntango nabandaki koteya likolo na *Bileko Nsambo ya Lingomba*. Mpe nabengaki Jack Moore, moto monene ya teoloji. Nalobaki: "Jack, Moto oyo ateleme wana azali Nani? 'Ezali na Moto moko lokola Mwana na Moto ateleme wana, ná nsuki mpembe lokola nsuki ya

mpaté." Nalobaki: "Azalaki elenge Mobali, ndenge nini Akokaki kozala nsuki mpembe lokola nsuki ya mpaté?"

Alobaki: "Ndeko Branham, yango ezalaki nzoto na Ye ya nkembo." Yango eyokanaki malamumu te.

Kasi ntango nakotaki na nkuku na ngai mpe nabandi kobondela, Apesaki ngai nzela ya koyeba soki ezalaki nini. Bomoni?

Nateyaka ntango nyonso ete Azalaki Nzambe, bobele moto te. Azalaki Nzambe oyo amonisami kati na mosuni; Nzambe, etaliseli ya Nzambe, ya bolingo; misala minene ya Nzambe oyo ekitaki mpe etalisamaki awa na mokili. Yesu azalaki bolingo ya Nzambe, oyo esalaki nzoto oyo kati na yango Yawe Ye moko abikaki. Azalaki Litondi ya Bonzambe kati na nzoto. Oyo Nzambe azalaki, Amonisaki yango na nzela ya nzoto yango. nzoto yango esengelaki kokufa, mpoi Ákoka kosukola Mwasi na libala na—na Ye—na Makila na Ye.

92 Mpe botala, Mwasi na libala Asukolami mpe Alimbisami kaka te, kasi Alongisami. Bomoni? Bosíla koluka koyeba soki liloba oyo *kolongisama* elingi koloba nini?

Sikawa, ndakisa, soki Ndeko Green ayoki ete ngai nazalaki komela masanga, nazalaki kosala makambo mabe, na nsima aye komona ete nasalaki yango te. Bongo ayei koloba na ngai: "Nalimbisi yo, Ndeko Branham."

"Olimbisi ngai? Nasála yango te. Olimbisi ngai na likambo nini?" Bomoni? Kasi soki nakwei na likambo, wana nakoki kolimbisama; kasi ata bongo nalongisami te, mpamba te nasalaki yango.

Kasi liloba oyo *olongisami* elingi koloba, "lokola soki osála yango ata moke te." Olongisami! Mpe na nsima Makila na Yesu Klisto epetoli biso bôngó na masumu, kino ete yango etyami kati na Buku na Nzambe ya kobosana. Bobele Ye nde akoki kosala yango.

Biso tokoki te. Biso tokoki kolimbisa kasi kobosana te. Nakoki kolimbisa yo, kasi nakoyeba ntango nyonso ete osalaki makambo mabe wâná. Na bongo, olongisami te, olimbिसami.

Kasi, na miso na Nzambe, Mwasi na libala alongisami. Asála yango ata moke te mpo na kobanda. Amen. Azali wana, abalani na Mwana na Nzambe ya lokumu; asála lisumu ata moke te mpo na kobanda. Mpo na nini? Abongisámá liboso. Akangamaki na motambo na oyo. Mpe sikawa ntango Ayoki Solo mpe Abimi, Makila epetoli Ye. Mpe Atelemi wana, na bizaleli malamumu. Bomoni? Ye, lisumu ata moko te likolo na Ye, ata moke te.

93 Yango wana, Nsango ezali kosangisa Mwasi na libala elongo, bomoni, koganga makasi.

Mpe kelelo ...

Moto moko wana, Ye, ná mongongo makasi, Agangaki na mongongo makasi mpe, mpe mongongo yango elamusaki Lasalo. Ná mongongo makasi Ye agángaki: "Lasalo, bima." Bomoni? Mpe mongongo elamusaki—elamusaki Mwasi na libala oyo alalaki, Alalaki kati na kufa.

PMpe kelelo: "Na mongongo na kelelo." Mpe ntango eleli, ezali kobenga. Ntango nyonso, kelelo ebengaka Yisalaele na Elambo na Bakelelo. Bomoni? Oyo ezalaki Elambo ya Pantekote, Elambo monene na mapata; mpe Elambo na Bakelelo. Mpe sikawa, kelelo ezali kosakola kosangana elongo: "Boya na Elambo." Mpe sikawa, yango ezali—Elambo ya Mwana na mpate na likolo.

Sikawa botala malamumu. Kosangana elongo ya Mwasi na libala, Elambo na Bakelelo, Elambo ya Libala. Tosili komona yango na bililingi. Sikawa botala mwa moke liboso tosukisa. Botala. Tomonaki yango na bililingi.

94 Sikawa, soki bolingi kotanga na Matai 18:16, elobami: "Misato ezali kopesa litatoli," bomoni, na Santu ... na mokapo ya 1Yoane 5:7, mpe bongo na bongo. Misato ezalaka ntango nyonso litatoli. Ezali boye te? [Losambo elobi: "Amen." — N.D.E.] Ezali koluka koyeba malamumu, eloko moko oyo ezali solo. Batatoli misato. "Na monoko ya Batatoli mibale to misato, tika liloba moko na moko etiana."

Sikawa botala. Tozalá na batatoli misato. Misato ezali litatoli. Sikawa, tosilá kozua konetolama misato na Kondimana na Kala. Bino boyebaki yango? Lokola litatoli. Sikawa botala malamumu. Enoka azali moko; Eliya azali mosusu; mpe Yesu azali mosusu.

Yesu, lokola Azali Libanga-Likonzi, Azali kopesa litatoli. Bomoni? Ye azalaki Libanga-Likonzi kati na Kondimana na Kala ná Kondimana na Sika, mpo Asengelaki naino kokufa mpe na sima konetolama. Akufaki; Azongaki na bomoi mpe Atambolaki awa elongo na biso; na sima Anetolamaki. Mpamba te Azalaki Libanga-Likonzi oyo esangisi biloko mibale wana elongo. Sima na lisekwa mpe konetolama na Ye ... Botala. Sima na Ye kosala yango, mpe Atalisaki yango polele na Kondimana na Kala kuna. Biso nyonso toyebi ete Enoka anetolamaki. Toyebi ete Eliya anetolamaki na mopepe makasi, ya solo, na likalo ya Móto. Mpe Yesu

akufaki, Akundamaki, Asekwaki mpe Abikaki awa na mokili, na sima Anetolamaki, Libanga-Likonzi. Ezali wana misato, mpo na kopesa litatoli. Boye te?

95 Sikawa, konetolama moko esili koleka. Bino boyebi yango? Boye, totala soki tokoki kotanga yango te, nokinoki. Tókamata Matai, mokapo ya 27. Mpe tika tozua nzela ya 45 ya Matai, mokapo ya 27. Totala soki tokoki kozua yango nokinoki, mpe totala soki—soki tokoki kobimisa uta na yango eloko moko oyo ekoki kosunga biso, nokinoki mpenza. 27:45, nakanisi nakomaki yango awa. Tótanga.

Sikawa uta na ngonga ya motoba, molili ekotaki likolo ya mboka mobimba kino na ngonga ya libwa ...

Mpe pene na ngonga ya libwa Yesu agangaki na mongongo makasi na kolobáká: Eli, Eli, lema sabaktani ...? ... oyo elingi koloba, ... Nzambe na ngai, mpo na nini Otiki ngai?

Bato mosusu kati na bango oyo bazalaki wana, ... bayokaki yango, mpe balobaki, moto oyo azali kobenga ... Eliya.

Mpe na mbala moko, moko na bango akendeki mbangu mpe akamataki linuká, atondisaki yango na mai ya ngai, mpe atiaki yango na nkekele, mpe apesaki Ye yango mpo na komela.

Kasi basusu balobaki ... totala soki Eliya akoya kobikisa ye.

Bongo Yesu, Agangaki lisusu ... na mongongo makasi, Azongisaki ...

“Mongongo makasi.” Mongongo makasi! Botala malamumu.

Ntango Yesu, ezalaki Ye kokufa, agangaki na mongongo makasi, akataki motema.

Mpe, tala, ezipelo ya tempelo epasukaki na biteni mibale uta likolo kino na nse; mpe mabele eninganaki, mpe mabanga mapasukaki;

Mpe malita mafungwamaki; mpe banzoto mingi ya ... basantu oyo balalaki esekwaki,

Mpe babimaki na bankunda sima na lisekwa na ye, mpe bakotaki na engumba ya bulee, mpe bamonanaki na bato mingi.

96 Konetolama moko esilá koleka.

Misato misalemá na Kondimana na Kala, mpo na baoyo babongisamaki mpe epai na bango Liloba na Nkolo eyaki. Bomoni? Liloba na Nkolo eyaki epai na Enoka. Liloba na Nkolo eyaki na Eliya, mosakoli na Ye. Bomoni? Liloba na Nkolo ezalaki Yesu. Bomoni?

Totala na Kondimana na Kala, bango basantu Kondimana na Kala sikawa, ntango yambo konetolama oyo esalemaki. Botala na molongo ya 50. Mongongo na Ye ya makasi elamusaki basantu ya Kondimana na Kala, bobele ndenge mongongo wana ya makasi elamuski Yesu ... to elamusaki Lasalo. Bomoni? Mongongo makasi ya kolamwisa.

Mpe likambo ya mibale ekokisami na Batesaloniki ya Mibale, mokapo ya 4. Tika totanga naino mwa moke, totanga yango. Touti kotanga yango, eleki mwa miníti moke. Bomoni?

...Tolingi te, ... bandeko, ete bozanga koyeba, na ntina na baoyo ... balali, mpo ete bozala na mawa te, ata ...

Ezali Batesaloniki ya Liboso, mokapo ya 4:12 kino na 18. Oyo, ekozala nde Konetolama ya mibale. Konetolama ya mibale ekozala komemama likolo ya Mwasi na libala.

97 Basantu ya Kondimana na Kala basilá kokende liboso na Bozali na Ye, mpe paladiso esilá kolongolama. Mpe basantu ya Kondimana na Kala bamataki likolo, na mongongo na Ye makasi, ntango Ye agangaki makasi mpe Azongisaki molimo; mpo ete (mpo na nini?) Mbeka, mbondi ya masumu na bango, oyo bazalaki kozela, na kondimáká ete Mwana Mpate oyo abongi be azalaki koya. Na ntina na yango bazalaki kopesa Mbeka ya Mwana na mpate. Mpe ntango Akufaki mpe Azongisaki molimo, Agangaki na mongongo makasi, mpe bansantu ya Kondimana na Kala balamukaki.

Botala koganga makasi mpe mpngongo oyo awa, likambo moko wana ekosalema na Boyei na Ye. Bomoni?

“Azongisaki molimo.” Mpe ntango Asalaki yango, Mbeka ebongaki be, mpe paladiso esilaki. Mpe basantu ya Kondimana na Kala bayaki lisusu na mokili, batambolaki na mokili, mpe bakotaki elongo na Ye, na konetolama na Ye.

98 Dawidi alobaki, kuna: “Bófungwama, bino bikuke ya seko, bófungwama.” “Amemi bakangami, Apesi makabo epai na bato,” mpe basantu ya Kondimana na Kala bakotaki elongo na Ye.

Balobaki: "Mokonzi oyo ya lokumu azali nani?"

"Yawe na Nkembo, elombe na mapinga." Mapinga na Nguya, mpe bakotaki na kotambola. "Yesu amemmaki bakangami," mpe Ye oyo Azali koya elongo na basantu ya Kondimana na Kala. Mpe bakotaki na bikuke ya sika kuna, mpe balobaki: "Bófungwama, bino bikuke ya seko, mpe botombwama. Mpe tika ete Mokonzi na Nkembo Akota."

Mongongo ebimaka uta na kati, elobaki: "Nani Mokonzi na Nkembo oyo?"

"Yawe, elombe na etumba." Bikuke bifungwamaki. "Mpe Yesu, Ye molongi Amemaki bakangami," baoyo bandimaki Ye, mpe Liloba eyaki epai na bango. Basantu ya Kondimana na Kala balalaki wana, bazalaki kozela: "Amemaki bakangami; Amataki na Likolo," amemaki basantu ya Kondimana na Kala mpe bakotaki kuna. Konetolama moko esili koleka.

Konetolama oyo ekosalema ezali (Batesaloniki ya Mibale) mpo na Lingomba, Mwasi na libala oyo esengeli kosekwa mpo na koneteloma na Nkembo. "*Biso baye totikali mpe tozali na bomoi,*" wana ezali nzoto oyo etikali na mokili, "*tokoleka liboso te to tokopekisa te bango baye balali. Mpamba te kelelo na Nzambe ekoyula liboso, mpe bakufi kati na Klisto bakosekwa.*" Bomoni? "*Mpe biso baye tozali na bomoi mpe totikali tokonetolama elongo na bango.*"

99 Mokolo mosusu, natelemaki na litúmu ya balabala. Mpe na—natelemaki likolo na ... natelemaki na litumu ya balabala mpe nazalaki kotala defile ya Mokolo oyo bikólo biyokanaki mpo na kosukisa Etumba ya liboso ya mokili mobimba; mpe ntango bazalaki komata, kotambola na balabala. Natelemaki wana elongo na mwana na ngai ya mobali ya moke, Yosefe. Mpe wana, mituka ya kalakala ya etumba ya liboso elekaki, mituka ya mikie mpe ya kala. Sima na yango, mituka minene Sherman ya bitumba ya sika elekaki, mpe ezalaki na masini minene mpo na kobeta bakano, ná madusu na—madusu epai masasi ebimaka mpe bongo na bongo.

Sima, basodá balekaki; ná—ná—ná bamama ya basoda oyo bakufaki na etumba. Na nsima, likalo moko elekaki ná ... likolo na ... Ee, likalo yango ezalaki na nkunda moko na liboso ya yango, lokola etaliseli ya liwa ya "sodá oyo ayebani te." Mpe wana etelemaki—soda moko atelemaki wana, mpo na kokengela nkunda yango. Sodá moko oyo babundaka na mayi atelemaki na ngámbo moko, mpe na ngámbo mosusu ezalaki na motambwisi masuwa. Mpe batiaki eloko moko mpo na kokabola. Mpe na ngámbo mosusu, mama ya sodá moko oyo akufaki afandaki. Abungisaki mwana na ye ya mobali. Elenge mwasi moko atelemaki wana, ná motó na ye likolo na mesa, azalaki kolela. Mwana mobali moko ya moke ná bilamba bipasuka na pembeni; mpe mpínzolí ezalaki kokita na elongi na ye. Tata na ye akufaki.

Nakanisaki: "Ezali mpenza mawa! Natelemi awa mpe nazali kotala, komona bango, basodá ya mibange oyo, bobele moke na bango nde batikali, kotamboláká wana, bibosono boye, ná basokoto na bango, kasi bazalaki kotalisa yango ná esengo nyonso mpamba te bazalaki bato na Amerika."

Nakanisaki: "Oh! Nzambe na ngai!"

100 Mokolo moko, lokito moko kouta na Likolo ekoya: "Mpe bakufi kati na Klisto bakosekwa liboso." Basantu ya Kondimana na Kala oyo bazali kozela kuna, lokito ekolela mpe bango bakobima kuna liboso, mpo na bakokota na lisekwa. Tokokota na molongo, mpe tokokende na likolo; banzoto ya kala oyo ya kufa ebongwami mpe ekomi lokola nzoto na Ye Mpenza ya nkembo. Defile—defile ya ndenge nini oyo ntango ekobanda komata na likolo moko na mikolo oyo, na ntango ya konetolama oyo ezali liboso na biso, oh, bakotalisa na esengo nyonso Makila na Yesu Klisto likolo na bantólo na bango, Nsango na Nzambe ya ntango oyo bazalaki kobika kati na yango. Yango nde ntango oyo tozali kozela, bandeko.

Botala, sikawa mpo na kosukisa. Lisekwa ya mibale, nyonso ... Oyo ya liboso esili koleka. Oyo ya mibale ebelemi sikawa, ékomi pene sikawa.

Sikawa, oyo ya misato ezali batatoli mibale ya Emoniseli 11:11 mpe 12. Baoyo bazali nde bazali kozonga ná Molimo na Klisto, mpo na kotatola na Bayuda, lokola Yosefe asalaki na bandeko na ye. Mpe bobosana te ete bibembe na bango elalaki na balabala mpo na mikolo misato na ndambo. Na nsima molimo na bomoi eyaki kati na bango, mpe banetolamaki, bakamatamaki na Likolo.

Wana nde konetolama misato na bino ya Kondimana na Sika.

Konetolama misato ya Kondimana na Kala; nyonso esila koleka.

Sikawa tomilengeli, tozali kozela konetolama, Konetolama ya basantu. Elobamaki, mpe ekozala bongo. Ntango Nzambe alobi likambo moko, "Likolo ná nse ekoleka, kasi Liloba oyo ekokwea ata moke te."

101 Ntango Nzambe alobaki, kuna na Genese 1, Alobaki: "Tika ete pole ezala." Ntango mosusu elekaki mibu nkama na nkama liboso ete pole ézala. Alobaki: "Tika ete nzete ya mbila ézala. Tika ete nzete ebengami bokungú ézala. Tika ete esobé ézala. Tika ete ngomba moko ézala. Tika ete eloko boye ézala." Alobaki yango, bomoni. Mpe na ntango nyonso oyo yango ebimaki na monoko na Ye, Ina lolenge ya

Liloba, yango esengeli komonisama. Esengeli kozala bongo. Ntango ...

Na sima, mokolo moko, Abengaki libota na Ye ete babima. Mpe Alobaki na moto moko na nkombo na Mose, na nzela na Likonzi na Móto, Pole; Móto Mosantu ya Búlee. Mpe Mose akokaki te ... Bato balingaki kondima Mose te, na bongo Alobaki: "Mema bango na ngomba oyo."

Na ntongo wana, ngomba etondaki na Móto, mikalikali mpe bankake lolenge wana. Na bongo bato balobaki: "Tika te ete Nzambe áloba. Tika Mose áloba, bomoni, noki te tókúfa."

Nzambe alobaki: "Nakoloba na bango lisusu boye te, kasi Nakotelemisa mosakoli moko mpo na bango. Mpe Nakoloba na nzela na ye, mpe makambo nyonso ye akoloba ekosalema. Na boye, bino boyoka Yango, mpamba te Nazali—Nazali elongo na ye." Sikawa, Ye Alobaki bongo. Alobaki ete yango ekosalema.

102 Botala mosakoli oyo, Yisaya, atelemaki wana; moto, moto na mayele, moto oyo azalaki na boninga ná mokonzi Uziya, mpo abikaki elongo na ye. Mokonzi, oyo azalaki moto monene, amekaki mbala moko kokamata esika ya motei mpe akotaki na tempelo, abetamaki na bongo na maladi ya maba.

Mpe yango nde likambo nayebisaki bato na mombongo. Boluka ata moke te kozua esika ya motei. Te, mbuta muntu. Yo tikala bobele na esika ozali. Bomoni? Sala mosala na yo, oyo Nzambe ayebisaki yo ete ósala. Soki ozali mosapi, okoki kozala litoi te. Soki ozali litoi, okozala zolo ata mbala moko te, to zolo, liso. Bomoni? Tikalá na esika na yo.

Boyokaki Nsango oyo mokolo mosusu na emisio ya radio: *Komeka Kosalela Nzambe Mosala*. Dawidi, mokonzi oyo apakolamaki. Bato nyonso bazalaki koganga makasi ete, "Ezalaki malamú." Kasi ye atunaki mosakoli ya Nzambe ata moke te. Na bongo moto moko akufaki, mpe likambo yango mobimba ebébaki. Koluka te kosala eloko mpo na kosunga Nzambe. Yo zela kino ete makambo oyo Nzambe alingi ékoka. Tika ete yango esalema na lolenge oyo Ye Asalaka yango. "Nakobanda eloko monene oyo. Ekosala boye." Zala na bokebi, ndeko.

103 Nzokande Dawidi ayebaki malamú nini kosala. Natana azalaki kati na mboka, na ntango wana. Kasi batunaki ye ata moke te. Bomoni? Atunaki bakonzi ya basodá ya bato nkama na nkama mpe nkoto na nkoto. Bato nyonso bagangaki na esengo mpe babinaki. Na esika ete ... Bazalaki nakoningana nyonso na losambo, kasi ezalaki na molongo mpe na boyokani ya Liloba na Nzambe te, mpe yango etambolaki te.

Eloko mosusu nyonso oyo ezali na molongo mpe na boyokani ya Liloba na Nzambe te ekokwea. Bobele Liloba na Nzambe nde ekotikala mpo na libela. "Likoló mpe nse ekoleka, kasi Liloba na Ngai te."

104 Botala Yisaya, elenge mobali wana ya mayele oyo azalaki wana. Na mbala moko, Molimo ekitelaki ye. Akokaki koloba eloko oyo ekeseni te. Azalaki mosakoli. Alobaki: "Tala, moseka akokúmba zemi." "Epai na biso Mwana mobali abotami; Mwana abotami, Mwana mobali moko apesami. Nkombo na Ye ekobiangama Mopesi toli, Nkolo ya kimya, Nzambe na Nguya, Tata na seko. Suka ya ... Bokonzi ekozala likolo ya mapeka na Ye. Suka ya ... Boyángelai na Ye ekozala na suka te." Ndenge nini moto wana akokaki koloba na mayele na ye ete mongondo akokumba zémi?

Bato nyonso bazalaki kozela yango. Yango esakolamaki. Ezalaki YANGO ELOBI NKOLO. Esengelaki kokokisama, mpo ete ezalaki Liloba na Nzambe. Kaka ndenge ezalaki na Genese, ntango Alonaki mimboto na nse ya mbu, ntango mabele ezalaki na lolenge moko te mpe mpamba; mpe mai ezalaki kati na mozindo. Bomoni? Esengelaki kokokisama. Mpe mokolo moko, sima na mibu nkama mwambe, libumu na mongondo ekumbaki zémi ya Momboto na Nzambe, Momboto oyo ekelamaki. Abotaki Mwana Mobali.

Mwana yango moko atelemaki wana, mokolo moko. Alobaki: "Lasalo, bima." Mpe moto oyo akufi mikolo minei, oyo asilaki kopola, zolo na ye edindaki na kati, azalaki kolumba solo, abimaki. Alobaki:

Bokamwa te mpo na likambo oyo: mpo ete ngonga ezali koya, amen, ntango baoyo nyonso bazali kati na nkunda bakoyoka mongongo ya Mwana na Nzambe,

Boye, yango esila kosakolama. Esengeli kosalema ndenge wana. Konetolama ekozala. Hólalá!

105 Nazali kokanisa Liteya na ngai ya suka na Californie, esika nakanisaki ete nakozonga lisusu te, ntango nasakolaki ete: "Los Angeles ekozinda na nse ya mbu. YANGO ELOBI NKOLO." Ekosalema. Esili mpo na ye. Abebisami. Abungi na ye. Ntango nini? Nayebi te ntango nini, kasi ekozindisama. Bobele sima na yango, mabele ebandaki koningana mpe kolenga.

Bobosana te ete mingi kati na bato oyo batelemi kuna bazalaki wana na mokolo yango ntango Mwanje akitaki kuna. Mpe Pole yango ná mpe Móto ekitaki longwa na Likolo, zongazonga na libanga na ntango totelemaki wana. Mabanga mapimbwaki uta na bangomba, mpe makweaki zongazonga na biso. Kopasuka makasi ebetaki mbala misato. Nalobaki: "Kosambisama ekobeta na Bokula ya Elimwelo na Ntango." Mikolo mibale na sima, Alaska ekomaki penepene na kozindisama.

106 Bobosana te; Nzambe moko oyo alobaki bongo, alobaki: "Los Angeles ekozinda." Mpe esili mpo na

yango. Nayebi te ntango nini. Nakoki koyebisa bino te.

Nayebaki te ete nalobaki bongo. Kasi ndeko oyo awa, nakanisi ete ezalaki ... Te. Moko ya bandeko Mosely, nakanisi, azalaki elongo na ngai kuna na balabala. Nayebaki te soki ezalaki nini, kino ntango natalaki. Natalaki kati na Makomi.

Mpe Yesu alobaki: "Kapernaume, Kapernaume, mbala boni ... Yo oyo ozali komitombola, kutu, kino na Likolo, okokitisama kino na lifelo. Mpamba te soki misala na nguya oyo esalemaki kati na yo, ésálémaka na Sodoma, elingaki kozala kino lelo." Mpe pene na mibu mokama na ntuku mitano na sima, (Sodoma asilaki kokota na nse ya mabelé) Kapernaume mpe ezali na nse ya mai lelo.

107 Mpe Molimo yango moko ya Nzambe oyo elobaki makambo nyonso mpe Esalaki makambo nyonso wana, Elobaki kuna: "Oh, engumba ya Kapernaum, yo oyo ozali komibenga na nkombo na Banje, Los Angeles, boni omitomboli kino na likolo! Mosisa mpenza mpe kiti ya Satana, bomoni, omitomboli."

Ezali nkunda mpo na batei. Bato malamumu bazali kokende kuna mpe kokufa lokola bampoko. Likámá nini oyo!

"Yo oyo ozali komibengia na nkombo ya Banje; soki misala na nguya oyo esalemaki kati na yo mísálámaka na Sodoma, elingaki kozala naino kino lelo. Kasi ntango na yo ekoki."

Bino botala, mpe bokomona. Soki ezali bongo te, nazali mosakoli ya lokuta. Bomoni? Ye wana. Azali wana.

108 Nazali lisusu kokanisa butu wana, liboso na ngai komona yango, namonaki etaliseli ya Mwasi na libala. Natelemaki wana mpe namonaki elenge mwasi moko kitoko, oyo alataki mpenza na ndenge elongobani mpe bongo, azalaki kotambola na ngámbo oyo. Moto moko azalaki pembeni na ngai, kati na emononeli. Mpe namonaki. Alobaki: "Etaliseli ya Mwasi na libala." Namonaki Ye koleka. Bayaki na ngámbo oyo, mpe babalukaki.

Nayokaki yango koya, ma—mangomba eutaki na ngámbo mosusu wana. Lingomba ya Azía eyaki. Oh, toloba na ntina na mbindo! Tala lingomba ya mikili ya Mpótó koya. Hólalá! Mpe na sima nayokaki miziki ya rock-and-roll koya, ezalaki elenge mwasi ya Amerika, lingomba, mpe azalaki kutu ata na bilamba te. Asimbaki bankasa, lokola bazulunale, ya langi ya mbwé na liboso na ye, mpe azalaki kobina rock-and-roll; elenge mwasi ya Amerika, lingomba.

Natelemaki wana Liboso na Bozali na Ye. Nakanisaki: "E Nzambe, lokola motei, soki oyo nde nyonso ya malamumu koleka tokokaki kosala? Oh! Oh!" Boyebi ndenge bozali komiyoka. Bongo, namilobelaki: "Nzambe, bomba ngai. Soki nakoki bobele kolongwa na esika oyo. Soki na nyonso oyo tosali, ezali mpo na kobimisa bobele oyo, soki ezali nde yango?"

109 Na sima ntango basi mosusu balekaki, kominisingisáká mpe kosaláká makambo nyonso wana, bazalaki na suki mikuse, mpe bipakolápakola na bilongi. Mpe wana ezalaki bango koleka pembeni boye, bango oyo basengelaki kozala bana basi baseka mpo na Klisto. Mpe ntango balekaki boye, nabalolaki motó na ngai, boyebi, ná oyo liboso na ngai. Ezalaki—ezalaki nsoni, mokongo na bango. Mpe bazalaki wana, bazalaki kotambola bongo. Mpe nabalolaki motó na ngai mpo na kolela, motindo wana.

Nalobaki: "Na—nakoki koyikela yango mpiko te. Ye azalaki wana, mpe ngai, koyebáká ete nazali motei na Lingomba, mpe yango nde nyonso nabimisi mpo na Ye." Nalobaki: "E Nzambe, nakoki kotala yango te. Tika ngai nakufa. Tika ngai—tika ngai nálímwa," lokola bongo.

Mpe kaka ntango balekaki, ntango nyonso moko na bango azalaki koya, azalaki kokende na esika moko boye mpe kolimwa na kokita na nse. Nazalaki bobele koyoka mongongo ya yango ndenge ezalaki kokende.

Mpe na siima nayokaki eloko moko lokola loyembo *Bokende Liboso Basoda Baklisto*. Natalaki, mpe tala koya etonga ya bilenge basi basantu wana, mpenza ndenge bazalaki lokola ntango balekaki liboso, balataki na ndenge elongobani, suki na bango ekitaki kino na nse na mokongo na bango. kitoko, peto, kotamboláká boye, na litambé ya Nsango Malamumu. Azalaki Liloba. Bamonanaki lokola bautaki na bikólo nyonso. Nazalaki kotala bango lokola bazalaki koleka, mpe namonaki bango koleka. Na esika ya kokita na nse, babandaki komata.

Namonaki moko na bango komeka, mibale to misato na bango komeka - kobima na molongo. Nagángáki: "Botikala na molongó." Mpe emononeli yango etikaki ngai. Mpe natelemaki wana na ndako, nazalaki koganga: "Botikala na molongó." Botelema na molongó wana.

110 Nazali komituna, yango esili nde koleka? Ekoki kozala ete Mwasi na libala asili kobengama? Yango nde likambo tozali kobika lelo?

Asengeli kobongisama mpe kokoma na Elilingi ya Klisto, mpe Klisto azali Liloba. Yango nde likambo

bobele moko. Bomoni? Ezali Kuna na kati, na kati ya Liloba. Ezali bobele ... Bomoni? Eloko ata moko te ekoki kobakisama. Ekoki kozala mwa—mwasi moko ná loboko moko lokola loboko ya mobali, mpe loboko mosusu lokola lokolo ya mbwa. Esengeli kozala mpenza Liloba na Nkolo, ndenge Azali Liloba. Mwasi na libala azali eteni ya Mobali na libala. Mwasi azali eteni ya mobali na ye, mpo abimaki uta na mobali yango. Ewa azalaki eteni ya Adama, ya mopanzi na ye. Ezali mpe bongo mpo na Mwasi na libala, alongolamaki na ebongiseli te, kasi autaki kati na Liloba na Nzambe mpo na eleko oyo.

111 Konetolama!

Kelelo ya Nkolo ekoyula, bakufi kati na Klisto bakosekwa.
Mpe bakokabola nkembo ya lisekwa na Ye;
Ntango baoyo baponami bakoyangana na Mboka na bango leka likoló.

Ntango bankombo ekobengama kuna na likolo, tika ete biso nyonso tómeke kozala Kuna, baninga. Nzambe ápambola bino.

Yango esakolamaki. Esengeli kokokisama. Ekosalema. Mpe mwa ... [Maloba mazangi na eteni oyo ya bande — N.D.E.]

Baninga, moto moko te alingi kokufa. Moto moko te alingi ko—kobunga. Tika nayebisa bino. Nyonso bosalaka ... Ata soki bozali na mpiko ya ndenge nini ya kokende na losambo, mpe boni botikali sembo na losambo. Ezali na yango malamau; natemeli yango te. Bosengeli kokende na losambo. Bosala bongo. Bokoba kokende na losambo. Kasi, ata soko nini, bobwaka mimesano na bino, mpe bokota mbala moko kati na Klisto. Mpamba te, ekoki koyula moko na mikolo oyo, mpe okozwama ná elembo na nyama likolo na yo, mpe okoyeba te nini ezali kino ngonga ekosila koleka. Ezali mpenza ya solo.

112 Nzambe ápambola bino. Bolimbisa ngai ndenge naumisi bino. Mpe bobosana te. Nabombaki bato awa ntango molai. Ya solo. Mpe makabo oyo bozwaki mpo na ngai ... Oyo ngai nasengaki te ete ósala yango, ndeko. Yango, ólalá, yango ezali boboto. Kamata mosolo yango mpe futa otele—ba ngonga oyo nalekisi likolo, mpamba te naumisi yango. Nazalaki bobele na mwa makambo mosusu awa. Nazali na nkasa pene na mwambe to zomi lisusu awa likolo na Konetolama oyo, kasi na—nazwi mpenza ntango ya kopesa bino yango te. Nzambe ápambola bino.

Bolingi Nkolo Yesu? [Losambo elobi: "Amen." — N.D.E.] Totikala kimia mpo na miniti moko sikawa, na kimia mpenza, na limemia, mpe tokanisa makambo oyo nauti koloba. Bobosana te, tozali na bangonga ya suka.

Bikólo bizali kopanzana, Yisalaele azali kolamuka,
Bilembo oyo Biblia esakolaki;
Mikolo ya Mabota ekómi ya kotanga, etondi na nsomo;
"Bozonga, E bino bapalangani, epai na bino."
Mokolo na lisiko ebelemi,
Mitema na bato ezali kosenzwa na nsomo;
Botondisama na Molimo, minda na bino elengelami mpe engengisami,
Botombola miso, lisiko na bino ebelemi.

Boyebi yango?

Basakoli ya lokuta bazali kokosa. Solo na Nzambe, bazali kowangana.

Toyebi ete ezali solo. Boye te? [Maloba mazangi na eteni oyo ya bande — N.D.E.]

Nalingi Ye, nalingi Ye
Mpo Alingaki ngai liboso
Mpe Asombi lobiko na ngai
Likolo na Ekulusu.

Bato boni balingi Ye mpenza? Botómbola loboko. Sikawa, nalingi ete, wana tozali koyemba yango lisusu, pesana mbote ya loboko na moto oyo afandi pembeni na yo. Loba: "Nzambe ápambola yo, moleki nzela." Bisu tozali baleki nzela. Boye te? [Losambo elobi: "Amen." — N.D.E.] Baleki nzela mpe bapaya.

Nalingi Ye,

Ezali bongo, kaka na ngámbo ya mesa.

Nalingi Ye
Mpo Alingaki ngai liboso
Mpe Asombi lobiko na ngai
Likolo na Ekulusu.

113 Bolingi kozala na Konetolama? [Losambo elobi: "Amen." — N.D.E.] Bato boni bazali na mposa ya kozala na Konetolama? Loba: "E Nzambe, nalingi kozala kati na yango, na motema na ngai mobimba."

Simba loboko ebongwanaka te ya Nzambe, boyebi loyembo yango? Oyebi yango, ndeko mwasi? Simba loboko ebongwanaka te ya Nzambe. Nayebi te soki ... Soki nini, mpo na oyo? Nini?

Simba loboko ebongwanaka te ya Nzambe!
 Simba loboko ebongwanaka te ya Nzambe!
 Tya elikia na yo likolo na makambo ya Seko,
 Simba loboko ebongwanaka te ya Nzambe!

Bolingi yango?

Ntango mobembo na biso esili,
 Soki 'na Nzambe ozalaki sembo,
 Ndako na yo ya kitoko mpe ya kokenga kuna na Nkembo,
 Molimo na yo enetolami ekomona!
 Simba loboko ebongwanaka te ya Nzambe!
 Simba loboko ebongwanaka te ya Nzambe!
 Tya elikia na yo likolo na makambo ya Seko,
 Simba loboko ebongwanaka te ya Nzambe!

Nalingi ete Bógumba mitó na bino mwa moke sikawa.

Kolanda bozwi ya mpamba ya mokili oyo te,
 Oyo ebebaka nokinoki,
 Luka kozwa bozwi ya lola,
 Yango ekoleka ata moke te!
 Simba loboko ebongwanaka te ya Nzambe!
 Simba loboko ebongwanaka te ya Nzambe!
 Tya elikia na yo likolo na makambo ya Seko,
 Simba loboko ebongwanaka te ya Nzambe!

114 Ná mitó na bino bogumbi, mpe ná likambo yango na makanisi, koyebáká ete togumbi mitó na biso na mputulú epai wapi tozwamaki, mpe tokozonga kuna mokolo moko, koyebáká ete bozali na bomoto ya kati oyo ekoyanola liboso na Nzambe. Mpe soki oyoki ete obelemi te mpo na Konetolama yango, soki Eyei na mpokwa oyo, mpe okolinga ete bakanisa ye na libondeli, tombola kaka loboko. Tozali na esika ya kobenga bato na etumbelo te. Etumbelo na yo ezali na motema na yo, ata bongo. Tómbola loboko. Nzambe ápambola yo, yo, yo. Oh! la la!

“Nayoki ete nabelemi te, Ndeko Branham. Na—na, solo, na—na—nalingi kozala Moklisto. Nameká kozala moklisto, kasi eloko moko ezangangaka ntango nyonso. Na—nayebi ete na—nazali mpenza te esika nasengelaki kozala.”

“Zálá na mawa, e Nzambe. Natomboli loboko na ngai. Yokelá ngai mawa.”

Sikawa, maboko ntuku mibale to ntuku misato masili kotombwama kati na etonga moke oyo. Misusu mizali kaka kotombwama.

115 E Nzambe, Oyebi nini ezali nsima na loboko yango, kuna na nse ya motema. Nabondeli Yo, Nzambe molingami. Nazali na mokumba ya likambo bobele moko, ezali ya koloba Solo. Mpe Nzambe molingami, balingi kobikisama. Balingi, mpenza kobikisama. Balingi—balingi te eloko moko oyo ezali bobele koningana na nzoto, mwa mosala moko, mwango ya ebongiseli moko, bindimeli moko, mateya oyo ebakisamaki. Bayebi, Tata, ete é sengeli Liloba ya peto oyo esangisami te ya Nzambe. Nyonso mosusu ekoleka, ata likolo mpe nse ekoleka, kasi Liloba na yo ekoleka te. Mpe soki tozali Liloba yango, mokili ekoleka na nse na biso, kasi biso tokoki koleka te, mpo ete tozali Liloba yango, Mwasi na libala ya Mobali na libala.

Nabondeli mpo na moko na moko, ete Okopesa bango, Tata, ezali libondeli na ngai oyo ya solosolo. Mpe limbisa ngai, Tata, mpamba te nazalaki na motema likolo-likolo na mpokwa oyo, nakomaki awa na sima na ntango, mpe—mpe nakolenga, nazalaki koloba maloba ya kokátakata mp oyo ezalaki kolandana malamuru te. Tika ete na lolenge moko to mosusu, Molimo Mosantu monene, obongisa yango malamuru na lolenge na Yo Moko ya Bonzambe, mpe Opesa yango na mitema ya bato, lokola kouta na motema na ngai mpe ntina nà mpe mwángo oyo na motema na ngai nazali na yango epai na Yo. Okosala yango te, Nkolo? Mpe bikisa baoyo bakoki kobikisama. Benda bango epai na Yo, Nkolo. Mpe tika ete tomilengela mpo na ntango wana ya konetolama oyo ekomi pembeni. Mpo Nasengi yango na Nkombo na Yesu. Amen.

Nzambe ápambola bino.

Sikawa, mokambi ya—ya likita.



www.messagehub.info

Mateya eteyami na
William Marrion Branham
"... Na mikolo ya mongongo..." Emoniseli 10:7